

I. DISPOSICIONES XERAIS

MINISTERIO DA PRESIDENCIA

3904 *Real decreto 203/2010, do 26 de febreiro, polo que se aproba o Regulamento de prevención da violencia, o racismo, a xenofobia e a intolerancia no deporte.*

A aprobación da Lei 19/2007, do 11 de xullo, contra a violencia, o racismo, a xenofobia e a intolerancia no deporte, supuxo a introdución de importantes novidades nesta materia que requiren desenvolvemento regulamentario, o cal recolle este real decreto.

A aprobación da mencionada lei supuxo a modificación e ampliación dos preceptos referidos á prevención da violencia nos espectáculos deportivos da Lei 10/1990, do 15 de outubro, do deporte, que tivo o seu desenvolvemento regulamentario no Real decreto 769/1993, do 21 de maio, no que se aprobou o Regulamento para a prevención da violencia nos espectáculos deportivos, así como as modificacións introducidas nel polo Real decreto 1247/1998, do 19 de xuño, tendo en conta as peculiaridades do baloncesto profesional.

Evidenciouse que o referido regulamento de prevención da violencia nos espectáculos deportivos demostrou sobradamente a súa utilidade para contribuír á erradicación da violencia no deporte e permitiu cumprir coas obrigas asumidas por España ao asinar o «Convenio europeo sobre a violencia e irrupcións de espectadores con motivo de manifestacións deportivas, e especialmente partidos de fútbol» do Consello de Europa, aprobado en Estrasburgo o 19 de agosto de 1985.

Non obstante, a Lei 19/2007, do 11 de xullo, amplía o concepto de violencia a aspectos como o racismo, a xenofobia e a intolerancia, mellora a definición legal das condutas ilícitas, regula novas medidas de prevención da violencia, o racismo, a xenofobia e a intolerancia no deporte, e reforza o papel da Comisión Estatal contra a Violencia, o Racismo, a Xenofobia e a Intolerancia no Deporte, regulada no Real decreto 748/2008, do 9 de maio.

Este real decreto incorpora as modificacións, inclusións e adaptacións necesarias para desenvolver a nova lei e facer así efectivas as súas innovadoras previsións, pasando a se denominar agora e en consecuencia «Regulamento de prevención da violencia, o racismo, a xenofobia e a intolerancia no deporte», quedando derogando o texto de 1993.

As novidades máis salientables supoñen que se adapten as mencións que se deben incluír nos títulos de acceso aos espectáculos deportivos, e que se regule o libro de rexistro de seguidores, o que debe resultar de grande utilidade para a consecución dos fins previstos na lei.

Así mesmo, incorpórase tamén a este regulamento a regulación dos plans individuais de riscos de cada unha das instalacións deportivas incluídas no ámbito de aplicación deste, que, aprobados con carácter anual polos delegados do Goberno nas comunidades autónomas, conterán as medidas que cómpre adoptar nos acontecementos deportivos, así como os protocolos de seguridade, prevención e control e o regulamento interno do recinto deportivo, instrumentos cuxa elaboración lles corresponde aos organizadores das competicións deportivas.

Por outro lado, régulanse os produtos que se introduzan ou expendan nos recintos deportivos, concretando as características que deben reunir, prevese a eventual emisión dun informe pola subdelegación do Goberno para mellorar a seguridade xurídica na aplicación destas disposicións; prohíbese, ademais, a venda de bebidas embotelladas ou a introdución polos asistentes de envases destas, para evitar o seu uso como proxectís, así como de bebidas alcohólicas, introducindo o contido das máis recentes recomendacións do Consello de Europa no marco do xa mencionado «Convenio Europeo sobre a violencia e irrupcións de espectadores con motivo de manifestacións deportivas, e especialmente partidos de fútbol»; en concreto, as relativas á «lista de medidas que deben adoptar os

organizadores de acontecementos deportivos profesionais e as autoridades públicas» sobre o «uso de espazos de visualización pública para acontecementos deportivos de grande escala» e a relativa ao «uso de dispositivos pirotécnicos en acontecementos deportivos».

Establécese tamén a obriga do organizador de proceder á gravación de todo conxunto de asistentes ao recinto deportivo durante todo o espectáculo. Esta determinación é a única posible para identificar eficazmente os autores de infraccións á lei, pois o sistema actual non permitiu moitas veces rexistrar os sucesos, impedindo sancionar agresores que protagonizaron altercados ou agresións ou que lanzaron obxectos aos terreos de xogo, ocasionándolles graves danos ás persoas e ao desenvolvemento do espectáculo deportivo. É imprescindible cortar de raíz esta situación para evitar que se asente nas persoas violentas, racistas, xenófobas ou intolerantes unha sensación de impunidade ante as súas actitudes ilícitas. A previsión é proporcionada, posto que non supón un desembolso económico excesivamente elevado para os responsables de a desenvolver e aplícase exclusivamente ás competicións oficiais de carácter profesional na modalidade de fútbol, xa que son as que sofren na actualidade episodios desta natureza.

O capítulo VII regula o Rexistro central de sancións en materia de violencia, racismo, xenofobia e intolerancia no deporte que se prevé no artigo 29 da lei e que ata o momento estaba regulado pola Orde do 31 de xullo de 1997, do Ministerio do Interior. O novo réxime do rexistro prevé a situación derivada da transferencia de competencias nesta materia a algunhas comunidades autónomas, e establece o mecanismo de inscrición, cancelación e comunicación das sancións, con pleno respecto aos dereitos derivados da lexislación aplicable en materia de protección de datos de carácter persoal.

A nova regulación do rexistro fai especial fincapé en garantir o cumprimento das sancións de prohibición de acceso aos recintos deportivos, establecendo o seu réxime de comunicación polo rexistro e os seus medios de aplicación polas entidades deportivas e polos organizadores de espectáculos deportivos.

O capítulo VIII do regulamento inclúe «medidas de apoio á convivencia e a integración no deporte», de acordo co que establece o artigo 16 da Lei 19/2007, do 11 de xullo. Este capítulo estrutúrase en tres seccións, sendo a 1.^a delas a relativa a «Medidas de carácter preventivo e formativo», mentres que a 2.^a regula o Observatorio da Violencia, o Racismo, a Xenofobia e a Intolerancia no Deporte, que se constituíu o 22 de decembro de 2004 e que viña funcionando ata o día de hoxe sen normativa expresa, inserido na Comisión Nacional contra a Violencia nos Espectáculos Deportivos. Agora confíreselle carta de natureza, na liña que determina a alínea d) do artigo 16 da Lei 19/2007, do 11 de xullo, cando, entre as medidas que debe adoptar a Administración xeral do Estado co fin de promover a convivencia e a integración intercultural por medio do deporte, sinala a «do desenvolvemento do Observatorio da Violencia, o Racismo, a Xenofobia e a Intolerancia no Deporte, adscrito ao Consello Superior de Deportes, con funcións de estudo, análise, proposta e seguimento en materia de prevención da violencia, o racismo, a xenofobia e a intolerancia no deporte». Este observatorio configúrase como un órgano de carácter consultivo adscrito ao Consello Superior de Deportes, e régúlase a súa composición, funcións e réxime de funcionamento, adscribíndoo, como establece a lei, ao Consello Superior de Deportes, a través da súa Dirección Xeral de Deportes, e establecendo a súa coordinación coa Comisión Estatal contra a Violencia, o Racismo, a Xenofobia e a Intolerancia no Deporte.

Para concluír, e posto que para combater a violencia, o racismo, a xenofobia e a intolerancia no deporte non bastan medidas preventivas e represivas, cómpre despregar accións positivas que estimulen a paz, a tolerancia e a convivencia no deporte e demostren e preserven a súa aptitude como instrumento de formación en valores, tal e como proclama a lei no seu artigo 1. Nese sentido, na sección 3.^a do capítulo VIII créase o distintivo «Xogo Limpo», que se concederá sen prexuízo dos Premios Nacionais do Deporte e servirá como mención honorífica que recoñecerá o equipo e a afección das ligas profesionais e competicións que se destacasen polo seu cumprimento das disposicións contra a violencia,

o racismo, a xenofobia e a intolerancia no deporte e por fomentar nel a paz, a tolerancia e a convivencia.

O protagonismo e relevancia que a Lei 19/2007, do 11 de xullo, lle confire á Comisión Estatal contra a Violencia, o Racismo, a Xenofobia e a Intolerancia no Deporte explica que o dito órgano tivese unha intervención activa na elaboración deste regulamento. Ademais de ter recollido a opinión tanto da propia Comisión Estatal como das institucións representadas nela, durante a tramitación foron consultadas as federacións deportivas españolas, ligas profesionais, asociacións de deportistas profesionais e entidades deportivas en xeral, así como outro tipo de organizacións ou colectivos que desenvolven actividades de prevención da violencia no ámbito do deporte. No proceso de elaboración desta norma foron sumamente valiosas as consideracións e observacións realizadas pola Axencia Española de Protección de Datos, cuxas achegas contribuíron á mellora do texto resultante.

Na súa virtude, por proposta conxunta da ministra da Presidencia e do ministro do Interior, co informe do Ministerio de Economía e Facenda, de acordo co Consello de Estado e logo de deliberación do Consello de Ministros na súa reunión do día 26 de febreiro de 2010,

DISPOÑO:

Artigo único. *Aprobación do regulamento.*

Apróbase o Regulamento de prevención da violencia, o racismo, a xenofobia e a intolerancia no deporte, cuxo texto se inclúe a continuación.

Disposición adicional primeira. *Establecemento de medidas adicionais en recintos deportivos para competicións non profesionais.*

A Comisión Estatal contra a Violencia, o Racismo, a Xenofobia e a Intolerancia no Deporte, dentro do ámbito de aplicación da Lei 19/2007, do 11 de xullo, determinará os recintos que, ademais daqueles en que se celebren encontros das categorías profesionais de fútbol e baloncesto, deberán dispor de todas ou algunhas das seguintes medidas:

- a) De localidades numeradas e de asento para todos os espectadores.
- b) De unidade de control organizativo.

Cando, en virtude do establecido nos artigos 9 e 12.2 do regulamento, se acorde estender a implantación destas medidas a outras competicións, a citada comisión estatal deberá especificar as características, dotación material, dispositivos e condicións que deberá reunir a instalación das unidades de control organizativo. Así mesmo, deberase determinar se as instalacións deben contar con zonas reservadas e distantes para situar as afeccións dos equipos contendentes.

Disposición adicional segunda. *Prazos de execución de determinadas medidas.*

1. Os clubs deportivos e sociedades anónimas deportivas que, por ascenso ou calquera outro procedemento previsto nas normas reguladoras das competicións, obteñan dereito a participar en competicións profesionais disporán do prazo dun ano para o establecemento e entrada en funcionamento do sistema informatizado de control e xestión de venda de entradas e de acceso aos recintos deportivos.

2. Os citados clubs deportivos e sociedades anónimas deportivas disporán dun prazo de dous anos para adaptar as instalacións e recintos de forma que contén con localidades numeradas e con asentos para todos os espectadores, así como para a instalación de circuítos pechados de televisión e realización das construcións, instalacións ou soportes fixos necesarios para o funcionamento da unidade de control organizativo.

3. Así mesmo, os mencionados clubs deportivos e sociedades anónimas deportivas disporán dun prazo de dous meses desde a entrada en vigor deste regulamento para a elaboración dun libro de rexistro de actividades de seguidores.

Disposición derogatoria única. *Derogación normativa.*

Queda derogado o Real decreto 769/1993, do 21 de maio, polo que se aproba o Regulamento para a prevención da violencia nos espectáculos deportivos, así como a Orde do 31 de xullo de 1997, do Ministerio do Interior, pola que se regula o funcionamento do Rexistro Central de Sancións impostas por infraccións contra a seguridade pública en materia de espectáculos deportivos.

Disposición derradeira primeira. *Habilitacións para o desenvolvemento regulamentario.*

1. Facúltase o titular do Ministerio da Presidencia para ditar as normas complementarias e de desenvolvemento do disposto na sección 3.^a do capítulo VIII do Regulamento de prevención da violencia, o racismo, a xenofobia e a intolerancia no deporte e para ditar cantas disposicións resulten precisas para a súa aplicación.

2. Habílitase os ministros da Presidencia e do Interior para ditar outras disposicións precisas para o desenvolvemento e aplicación deste real decreto.

Disposición derradeira segunda. *Modificación do Real decreto 748/2008, do 9 de maio, polo que se regula a Comisión Estatal contra a Violencia, o Racismo, a Xenofobia e a Intolerancia no Deporte.*

Modifícase o artigo 3, número 1, do Real decreto 748/2008, do 9 de maio, polo que se regula a Comisión Estatal contra a Violencia, o Racismo, a Xenofobia e a Intolerancia no Deporte, cuxo texto queda redactado da seguinte forma:

«Realizarlles recomendacións ás administracións competentes sobre as condicións de seguridade dos espazos que se habiliten para a visualización pública de acontecementos deportivos, así como respecto das medidas que cómpre adoptar para previr neles condutas violentas, racistas, xenófobas e intolerantes.»

Disposición derradeira terceira. *Título competencial e competencias autonómicas.*

1. Este real decreto dítase ao abeiro do disposto no artigo 149.1.29.^a da Constitución, que lle atribúe ao Estado a competencia en materia de seguridade pública, salvo o previsto no capítulo VIII do regulamento aprobado por este real decreto, que se dita ao abeiro da competencia do Estado en relación coa organización do deporte federado estatal no seu conxunto.

2. O disposto no regulamento entenderase sen prexuízo das competencias atribuídas ás comunidades autónomas polos seus estatutos de autonomía en materia de deporte, así como das funcións que lles poidan corresponder ás comunidades autónomas con competencia para a protección de persoas e bens e para o mantemento da orde pública segundo o disposto nos seus respectivos estatutos.

Disposición derradeira cuarta. *Entrada en vigor.*

Este real decreto entrará en vigor o día 1 de xullo de 2010.

Dado en Madrid o 26 de febreiro de 2010.

JUAN CARLOS R.

A vicepresidenta primeira do Goberno
e ministra da Presidencia,
MARÍA TERESA FERNÁNDEZ DE LA VEGA SANZ

ANEXO

REGULAMENTO DE PREVENCIÓN DA VIOLENCIA, O RACISMO, A XENOFOBIA E A INTOLERANCIA NO DEPORTE

ÍNDICE

CAPÍTULO PRELIMINAR

- Artigo 1. Obxecto.
- Artigo 2. Ámbito.
- Artigo 3. Coordinación.
- Artigo 4. Persoas responsables en materia de prevención e control da violencia, o racismo, a xenofobia e a intolerancia no deporte.

CAPÍTULO I

Medidas de seguridade, prevención e control

- Artigo 5. Protocolos de seguridade, prevención e control.
- Artigo 6. Regulamento interno do recinto deportivo.
- Artigo 7. Plans individuais de risco.

CAPÍTULO II

Responsabilidade dos organizadores

Sección 1.^a Instalacións do recinto

- Artigo 8. Control informatizado de acceso ao recinto e de venda de entradas.
- Artigo 9. Asentos nas bancadas.
- Artigo 10. Localización no recinto do persoal dos medios de comunicación.
- Artigo 11. Instalación de mecanismos para a detección de armas e instrumentos análogos.
- Artigo 12. Unidade de control organizativo.
- Artigo 13. Revisión de instalacións do recinto.
- Artigo 14. Retirada de instrumentos perigosos.

Sección 2.^a Condicións de expedición, formato e características dos billetes de entrada

- Artigo 15. Venda dos billetes de entrada.
- Artigo 16. Formato e características.
- Artigo 17. Obrigas dos espectadores respecto dos billetes de entrada.
- Artigo 18. Numeración e control dos billetes de entrada.
- Artigo 19. Clases e tipos de billetes de entrada.
- Artigo 20. Anverso e reverso das entradas.

Sección 3.^a Actuacións respecto do libro de rexistro de actividades de seguidores e información

- Artigo 21. Obriga xeral. Libro de rexistro de actividades de seguidores.
- Artigo 22. Características do libro de rexistro de seguidores.
- Artigo 23. Información sobre grupos de seguidores.

Sección 4.^a Alto risco

- Artigo 24. Alto risco.

Sección 5.^a Produtos que se introduzan ou expendan nas instalacións deportivas

Artigo 25. Condicións dos produtos que se introduzan ou expendan nos recintos deportivos durante a celebración de espectáculos.

Artigo 26. Previsións contractuais e responsabilidade.

Sección 6.^a Cometidos e obrigas do persoal ao servizo dos organizadores

Artigo 27. Director de seguridade.

Artigo 28. Efectividade das obrigas legais.

Artigo 29. Prohibición de acceso ou expulsión do recinto.

Artigo 30. Separación de afeccións de equipos contendentes.

Artigo 31. Uso de dispositivos pirotécnicos en acontecementos deportivos.

Artigo 32. Acompañamento de seguridade.

Artigo 33. Formación profesional. Simulacros e emerxencias.

Artigo 34. Agrupacións de voluntarios.

CAPÍTULO III

Funcións das forzas e corpos de seguridade

Sección 1.^a Disposicións preventivas e cautelares de carácter xeral

Artigo 35. Funcións en materia de espectáculos deportivos.

Artigo 36. Cualificación do risco.

Artigo 37. Tarefas informativas.

Artigo 38. Rede preventiva de control.

Artigo 39. Planos de instalacións e chaves mestras.

Artigo 40. Reunións previas.

Artigo 41. Coordinación con outros servizos.

Sección 2.^a Medidas operativas, específicas e simultáneas

Artigo 42. Dispositivo de seguridade.

Artigo 43. Protección de participantes e público.

Artigo 44. Control de acceso ao recinto.

Artigo 45. Control de alcoholemia e drogas.

Artigo 46. Supervisión de actuacións.

Artigo 47. Control de capacidade.

Artigo 48. Áreas neutralizadas.

Artigo 49. Control de grupos de seguidores.

Artigo 50. Oficinas móbiles de denuncias.

Sección 3.^a Prácticas de capacitación

Artigo 51. Emerxencias e simulacros.

Artigo 52. Protección civil.

Artigo 53. Actividades de capacitación.

CAPÍTULO IV

Autoridades gubernativas e coordinadores de seguridade

Sección 1.^a Organización

Artigo 54. Disposicións xerais.

Artigo 55. Competencia.

Artigo 56. Nomeamento.

Sección 2.ª Cometidos

Artigo 57. Determinación de obxectivos.

Artigo 58. Deseño do dispositivo de seguridade.

Artigo 59. Funcións de coordinación xeral.

Artigo 60. Relacións.

Artigo 61. Funcións do coordinador de seguridade en cada club, sociedade anónima ou acontecemento deportivo.

CAPÍTULO V

A unidade de control organizativo

Artigo 62. Definición.

Artigo 63. Situación.

Artigo 64. Localización dos responsables de seguridade.

Artigo 65. Dotación.

Artigo 66. Circuito pechado de televisión.

Artigo 67. Megafonía.

Artigo 68. Enlaces de radio e telecomunicacións.

Artigo 69. Persoal técnico.

Artigo 70. Financiamento.

CAPÍTULO VI

Actas, informes e propostas

Artigo 71. Acta do espectáculo.

Artigo 72. Avaliación de medios, actuacións e resultados.

Artigo 73. Informe xeral.

Artigo 74. Propostas sancionadoras.

Artigo 75. Excesos da capacidade do recinto.

CAPÍTULO VII

Rexistro Central de Sancións

Artigo 76. Obxecto e adscrición.

Artigo 77. Protección de datos de carácter persoal.

Artigo 78. Inscripción e cancelación das sancións.

Artigo 79. Xestión do rexistro.

Artigo 80. Garantías de cumprimento das sancións de prohibición de acceso a recintos deportivos.

CAPÍTULO VIII

Medidas de apoio á convivencia e a integración no deporte

Sección 1.ª Medidas de carácter preventivo e formativo

Artigo 81. Do Plan de prevención da violencia, o racismo, a xenofobia e a intolerancia no deporte.

Artigo 82. Das convocatorias de axudas dirixidas á execución de medidas preventivas e formativas.

Sección 2.^a Do Observatorio da Violencia, o Racismo, a Xenofobia e a Intolerancia no Deporte

- Artigo 83. Natureza, obxecto e adscrición.
- Artigo 84. Funcións.
- Artigo 85. Composición.
- Artigo 86. Réxime de funcionamento.

Sección 3.^a Distintivo «Xogo Limpo»

- Artigo 87. Creación.
- Artigo 88. Modalidades e regras de concesión.
- Artigo 89. Uso do distintivo
- Artigo 90. Retirada do distintivo.

CAPÍTULO PRELIMINAR

Artigo 1. *Obxecto.*

Este regulamento ten por obxecto o desenvolvemento das medidas de prevención e control da violencia, o racismo, a xenofobia e a intolerancia no deporte contidas na Lei 19/2007, do 11 de xullo, contra a violencia, o racismo, a xenofobia e a intolerancia no deporte, e as que resulten aplicables da Lei orgánica 1/1992, do 21 de febreiro, de protección da seguridade cidadá.

Artigo 2. *Ámbito.*

1. As disposicións contidas neste regulamento serán aplicables con carácter xeral ás competicións deportivas oficiais de ámbito estatal organizadas por entidades deportivas no marco da Lei 10/1990, do 15 de outubro, do deporte, así como ás organizadas ou autorizadas polas federacións deportivas españolas.

2. A aplicación de determinadas medidas de seguridade, control e prevención previstas neste regulamento realizarase co alcance e efectos especificamente recollidos nos preceptos da Lei 19/2007, do 11 de xullo, que establecen os presupostos e os requisitos determinantes para poder exixir o cumprimento das obrigas, garantías e exixencias previstas na citada lei e neste regulamento.

Artigo 3. *Coordinación.*

Para a aplicación deste regulamento, establecerase un procedemento de colaboración coas comunidades autónomas tendente a asegurar unha aplicación xeral e homoxénea das medidas recollidas nel.

Así mesmo, e na medida en que for necesario, estableceranse mecanismos de colaboración coas entidades locais para asegurar o adecuado funcionamento nesta materia dos seus servizos de seguridade e a aplicación harmónica das medidas que se prevén neste regulamento.

Artigo 4. *Persoas responsables en materia de prevención e control da violencia, o racismo, a xenofobia e a intolerancia no deporte.*

1. As persoas que asistan ou acudan ás competicións deportivas previstas no artigo 2 deste regulamento deberán cumprir as obrigas establecidas na Lei 19/2007, do 11 de xullo, en particular as enumeradas nos artigos 6 e 7 da lei, así como as previstas neste regulamento. O incumprimento das prescricións establecidas nesta materia dará lugar á exixencia de responsabilidades segundo o establecido no título II da Lei 19/2007, do 11 de xullo.

2. As persoas que organicen probas, competicións ou espectáculos deportivos incluídos dentro do ámbito de aplicación deste regulamento responderán directamente

polo incumprimento das obrigas que lles impón a Lei 19/2007, do 11 de xullo, aos organizadores. Tamén responderán pola súa falta de dilixencia ou negligencia á hora de adoptar as medidas de prevención previstas para garantir o cumprimento por parte dos espectadores ou asistentes das obrigas establecidas nos artigos 4, 6 e 7 da Lei 19/2007, do 11 de xullo.

3. De conformidade e co alcance que se prevé nos convenios internacionais contra a violencia no deporte ratificados por España e na Lei 19/2007, do 11 de xullo, os organizadores serán responsables cando, por falta de dilixencia ou prevención, non adoptasen as medidas de prevención establecidas na Lei 19/2007, do 11 de xullo, e neste regulamento, ou cando as medidas acordadas resulten insuficientes ou inadecuadas.

CAPÍTULO I

Medidas de seguridade, prevención e control

Artigo 5. *Protocolos de seguridade, prevención e control.*

1. As persoas que organicen as competicións deportivas a que fai referencia o artigo 1 da Lei 19/2007, do 11 de xullo, e o artigo 2 deste regulamento deberán elaborar un protocolo de seguridade, prevención e control, no cal, ademais de reflectiren a adecuación da instalación aos requisitos establecidos pola normativa en materia de instalacións deportivas, se farán constar de forma pormenorizada as medidas adoptadas ou dispostas polos organizadores para garantir o cumprimento das obrigas establecidas en materia de seguridade pública e para previr ou evitar a comisión de infraccións no ámbito da prevención da violencia, o racismo, a xenofobia e a intolerancia no deporte.

O protocolo de seguridade, prevención e control é un documento interno de funcionamento e actuación do organizador e deberá ser remitido, para o seu coñecemento, á autoridade gubernativa competente e á Comisión Estatal contra a Violencia, o Racismo, a Xenofobia e a Intolerancia no Deporte, que, unha vez valorado no plano técnico, se incluírá nun arquivo específico. Se a comisión entende que o protocolo non cobre as necesidades do recinto ou non cumpre as especificacións da Lei 19/2007, do 11 de xullo, advertirá de tal circunstancia o remitente para os efectos da reparacións que procedan.

En función das obrigas ou medidas que deba adoptar cada organizador, os protocolos de seguridade, prevención e control serán de tres clases: abreviado, básico ou complementario.

2. O protocolo abreviado de seguridade, prevención e control deberá ser elaborado polos organizadores que deban adoptar as medidas de seguridade previstas nos artigos 3 a 5 da Lei 19/2007, do 11 de xullo. O protocolo abreviado deberá reflectir, como mínimo, as seguintes cuestións:

- a) as medidas de seguridade estrutural das instalacións deportivas,
- b) as medidas de prevención de condutas racistas, xenófobas ou intolerantes no interior dos recintos,
- c) as medidas de control de acceso e permanencia de espectadores, debendo especificar as adoptadas para evitar a introdución de obxectos ou produtos non autorizados pola súa perigosidade, rixidez, dimensións; para prohibir a venda ou consumo de bebidas alcohólicas e outras substancias prohibidas; así como para garantir que a venda de produtos no interior da instalación deportiva se axuste ás condicións establecidas,
- d) as medidas de control orientadas a evitar que a exhibición de simboloxía ou a difusión de mensaxes durante as competicións vulnere as previsións legalmente establecidas.

3. O protocolo básico de seguridade, prevención e control, que deberá ser elaborado polos organizadores que deban adoptar as medidas previstas nos artigos 3 e seguintes, 8 e 9 da Lei 19/2007, do 11 de xullo, complementará as medidas establecidas no protocolo

abreviado e incluíra, ademais das cuestións mencionadas no número 2 anterior, información sobre os seguintes aspectos:

a) a política de subministración e venda de entradas seguida polo organizador, coas medidas tendentes a garantir o cumprimento das obrigas de colaboración coas autoridades públicas, en particular as relativas á remisión de información sobre seguidores, á localización e identificación de potenciais infractores e á privación ou retirada de apoio aos afeccionados ou grupos de afeccionados nos casos previstos polos artigos 3 e 9 da Lei 19/2007, do 11 de xullo;

b) as medidas adoptadas a este respecto para garantir, cando proceda, unha adecuada separación dos afeccionados visitantes;

c) a coordinación das medidas previstas no protocolo co establecido noutros plans sectoriais de protección de bens e persoas.

4. O protocolo reforzado de seguridade, prevención e control deberá ser elaborado polos organizadores obrigados a implantar e asumir obrigas adicionais baseándose no disposto polos artigos 10 a 13 da Lei 19/2007, do 11 de xullo. O protocolo reforzado complementará o contido do protocolo básico e deberá reflectir a obrigatoriedade e alcance, de ser o caso, das obrigas nesta materia, con expresa mención:

a) das condicións de seguridade e estado de mantemento da instalación, que deberán mencionar expresamente as medidas adoptadas para evitar eventuais excesos de ocupación, total ou parcial, os requisitos e condicións exixidos pola autoridade competente para autorizar a instalación de bancadas supletorias ou elementos móbiles e as previsións adoptadas para garantir a existencia de localidades de asento en todas as bancadas;

b) da instalación de circuítos pechados de televisión e emprego de sistemas de videovixilancia que permitan gravar o acceso e todo o conxunto de asistentes ao recinto deportivo, así como as zonas circundantes en que se poidan producir aglomeracións, indicando as medidas adoptadas para garantir o seu bo estado de conservación e correcto funcionamento;

c) do dispositivo desenvolvido para poder efectuar rexistros de espectadores con ocasión do acceso ou durante o desenvolvemento do espectáculo, segundo o establecido no artigo 8.1 da Lei 19/2007, do 11 de xullo;

d) da política de subministración e venda de entradas seguida polo organizador das competicións, que deberá garantir, cando corresponda, unha separación adecuada de afeccións rivais, que se poderá realizar compartimentando a instalación e as vías de saída e acceso ao recinto;

e) do sistema de control informatizado e xestión da venda de entradas e de acceso ao recinto implantado e, cando resulte obrigado, dos dispositivos instalados para verificar a identidade dos que accedan ao recinto e dos sistemas de emisión e venda de entradas que permitan controlar a identidade dos adquirentes;

f) das iniciativas de promoción ou apoio das actividades dos afeccionados ou grupos de seguidores, que, en todo caso, se deberán adecuar ao disposto no artigo 3.1.h) da Lei 19/2007, do 11 de xullo;

g) da localización do persoal de medios de comunicación;

h) da dotación e elementos da unidade de control organizativo,

i) da determinación das medidas de seguridade privada adoptadas polo organizador, especificando o número e distribución dos efectivos seleccionados e concretando os cometidos e obrigas ao seu persoal,

j) da instalación de mecanismos ou dispositivos que permitan a detección de armas ou obxectos que puideren producir os mesmos efectos, así como bengalas, petardos, explosivos ou, en xeral, produtos inflamables, fumíferos ou corrosivos, e dispositivos pirotécnicos.

Artigo 6. *Regulamento interno do recinto deportivo.*

1. Os organizadores de competicións oficiais de carácter estatal e dos espectáculos deportivos incluídos dentro do ámbito de aplicación deste regulamento deberán elaborar un regulamento interno do recinto deportivo, que deberá ser visado pola federación deportiva española ou, no caso de competicións deportivas profesionais, pola liga profesional correspondente.

2. O regulamento interno do recinto deportivo a que se refire o artigo 7.2.c) da Lei 19/2007, do 11 de xullo, deberá especificar:

a) as obrigas que deberán cumprir os que asistan ou acudan ás instalacións deportivas durante a celebración das competicións en cuestión;

b) as prescricións que deberán observar os espectadores para poder cumprir as decisións adoptadas polo organizador para garantir, cando proceda, unha adecuada separación dos afeccionados visitantes;

c) as condicións que permitan facer efectivo o cumprimento das ordes de desaloxo total ou parcial das instalacións deportivas nos supostos previstos polos artigos 7 e 15 da Lei 19/2007, do 11 de xullo;

d) o procedemento para facer efectiva a privación de abonos vixentes ou a inhabilitación para os obter aos que sexan sancionados con carácter firme por condutas violentas, racistas, xenófobas ou intolerantes;

e) as normas, modalidades e condicións en que o organizador fomentará ou apoiará as actividades desenvolvidas por persoas ou grupos de seguidores, entre as cales se consideran incluídos os medios de transporte, locais, subvencións, entradas gratuítas, descontos, publicidade ou difusión ou calquera outro tipo de promoción ou apoio;

f) calquera outro aspecto que incida nos dereitos e obrigas dos que asistan aos recintos deportivos e que contribúa a garantir a seguridade e a orde pública nas instalacións.

3. O regulamento interno do recinto deportivo deberáselles facilitar aos coordinadores de seguridade ou, cando esa figura non exista, aos responsables dos corpos e forzas de seguridade encargados da coordinación da seguridade pública na correspondente instalación. Tanto estes últimos como os coordinadores de seguridade poderán solicitar a introdución das modificacións ou correccións que consideren convenientes para lograr un adecuado cumprimento das obrigas nesta materia ou para previr a realización de condutas prohibidas pola Lei 19/2007, do 11 de xullo, e por este regulamento.

Artigo 7. *Plans individuais de risco.*

Os delegados do Goberno nas comunidades autónomas ou, de ser o caso, os órganos competentes destas en materia de seguridade pública aprobarán anualmente, tras informe previo da Comisión Estatal contra a Violencia, o Racismo, a Xenofobia e a Intolerancia no Deporte e dos órganos competentes das forzas e corpos de seguridade do Estado, un plan individual de riscos que lle presentarán os organizadores responsables de cada unha das instalacións deportivas incluídas no ámbito de aplicación deste regulamento.

Os citados plans conterán, por separado, as medidas que se deben adoptar nos acontecementos deportivos ordinarios e naqueles que se declaren de alto risco de acordo co previsto no artigo seguinte deste regulamento.

Malia o anterior, o delegado do Goberno poderá ordenar actuacións puntuais de carácter adicional de conformidade co disposto no artigo 12 da Lei 19/2007, do 11 de xullo.

Así mesmo, a Comisión Estatal contra a Violencia, o Racismo, a Xenofobia e a Intolerancia no Deporte poderá adoptar as medidas que contén o artigo 13 da Lei 19/2007, do 11 de xullo, de acordo coa alínea d) do número 1 do artigo 3 do Real decreto 748/2008.

CAPÍTULO II

Responsabilidades dos organizadores*Sección 1.^a Instalacións do recinto***Artigo 8. Control informatizado de acceso ao recinto e de venda de entradas.**

Os organizadores responsables de todos os recintos deportivos a que se refire o número 1 do artigo 11 da Lei 19/2007, do 11 de xullo, deben establecer un sistema informatizado de control e xestión de venda de entradas, así como de acceso aos recintos. As ligas profesionais correspondentes incorporarán aos seus estatutos e regulamentos a medida de clausura dos recintos que non cumpran oportunamente esta obriga.

Os organizadores das competicións en que se instalasen estes sistemas son responsables da conservación e o mantemento dos dispositivos instalados e do seu adecuado funcionamento.

O número de localidades postas á venda non debe superar a capacidade segura das instalacións que se establece no plan individual de riscos da instalación que prevé o artigo 7 deste regulamento. O número total deberase reducir en función de calquera factor pertinente relacionado coa seguridade, o control e a orde pública ou se as condicións físicas ou o control da seguridade das instalacións son inadecuados.

Artigo 9. Asentos nas bancadas.

1. Os organizadores responsables de todos os recintos deportivos a que se refire o número 1 do artigo 11 da Lei 19/2007, do 11 de xullo, deberán adoptar as medidas necesarias para que os recintos onde se desenvolvan competicións da categoría profesional de fútbol, así como aqueles outros que no futuro se determinen na forma regulamentariamente prevista, dispoñan de localidades numeradas e con asentos para todos os espectadores.

2. A instalación de bancadas adicionais que, mesmo cumprindo os requisitos indicados, supoña unha ampliación da capacidade correspondente debe ser posta en coñecemento do coordinador de seguridade con carácter previo, e só será admitida se se achegan os informes suficientes que aseguren a integridade das persoas e o normal desenvolvemento da competición.

3. Os recintos deportivos en que se desenvolvan competicións oficiais de fútbol e daqueles outros deportes cuxa seguridade así o aconselle disporán, así mesmo, de zonas reservadas e distantes entre si para situar as afeccións dos equipos contendentes, impedindo materialmente a circulación dunha a outra zona.

Artigo 10. Localización no recinto do persoal dos medios de comunicación.

O persoal dos medios de comunicación deberá dispor, previamente ao comezo dos acontecementos deportivos, da acreditación necesaria, que deberá exhibir notoria e continuamente durante o transcurso dos ditos acontecementos, e situarase nas zonas reservadas para a súa localización.

Artigo 11. Instalación de mecanismos para a detección de armas e instrumentos análogos.

Os organizadores responsables de todos os recintos deportivos a que se refire o número 1 do artigo 11 da Lei 19/2007, do 11 de xullo, de acordo co coordinador de seguridade, poderán instalar nos recintos deportivos mecanismos ou dispositivos para a detección das armas e instrumentos análogos que describe a alínea a) do número 1 do artigo 6 da Lei 19/2007, do 11 de xullo.

Esta instalación será obrigatoria cando se estableza no exercicio da competencia prevista no artigo 13.1 da Lei 19/2007, do 11 de xullo, e sexa ordenada pola Comisión Estatal contra a Violencia, o Racismo, a Xenofobia e a Intolerancia no Deporte.

Artigo 12. *Unidade de control organizativo.*

1. De acordo co previsto no número 3 do artigo 14 da Lei 19/2007, do 11 de xullo, todas as instalacións deportivas da máxima categoría de competición profesional de fútbol e baloncesto contarán cunha unidade de control organizativo, instalada e en funcionamento. Cando tales unidades estean instaladas nos campos de fútbol, deberán incorporar as dotacións que se determinan nos artigos 65 a 69 deste regulamento e ademais os mandos de apertura automática dos sistemas de barreiras e valos de protección e separación de espazos e os medios electrónicos, mecánicos ou de calquera outra clase que desde a unidade permita controlar todo o conxunto de asistentes e o ritmo de acceso de espectadores por zonas.

Nas unidades de control organizativo instaladas nos recintos dedicados á práctica do baloncesto, serán de aplicación as previsións contidas nos artigos 67 e 68.2 deste regulamento.

2. Esta unidade será tamén obrigatoria en todas as instalacións para as cales no futuro así se determine en razón da importancia da competición, o número de asistentes ás competicións, a seguridade desta e a modalidade do seu desenvolvemento.

A decisión de implementación en recintos deportivos diferentes aos indicados no número anterior correspóndelle á Comisión Estatal contra a Violencia, o Racismo, a Xenofobia e a Intolerancia no Deporte.

3. Todos os medios e elementos técnicos de control e xestión de entradas, de acceso aos recintos, os medios audiovisuais da unidade de control organizativo, as barreiras e valos de protección e separación, así como calquera outro medio electrónico, mecánico ou de calquera outra clase instalados nos recintos deportivos deberán ser compatibles entre si e susceptibles de constituír un sistema único, integrado e operativo.

Artigo 13. *Revisión de instalacións do recinto.*

Antes de cada acontecemento deportivo comprendido no ámbito deste regulamento, o responsable de seguridade ao servizo do organizador responsable efectuará unha avaliación continua dos riscos e practicará un recoñecemento do recinto para avaliar o grao de adecuación das instalacións ás disposicións vixentes, pódoo en coñecemento do coordinador de seguridade, con antelación suficiente e con indicación de día e hora, co obxecto de que poida, se o estima necesario, supervisar a súa realización. En especial, revisarase o funcionamento de portas antipánico, abatemento de valos, servizos de evacuación e salvamento, sistemas de prevención, alarma e extinción de incendios, condicións de seguridade, hixiene e, de ser o caso, iluminación e ventilación.

Artigo 14. *Retirada de instrumentos perigosos.*

Se no curso do recoñecemento previo se acharen obxectos ou instrumentos perigosos, prohibidos pola lei, ou outros similares ou análogos, procederase á súa retirada inmediata e á súa entrega ao coordinador de seguridade.

Sección 2.^a Condicións de expedición, formato e características dos billetes de entrada

Artigo 15. *Venda dos billetes de entrada.*

1. A venda de billetes de entrada, cando teña lugar no recinto deportivo, realizarase única e exclusivamente nos despachos de billetes instalados no propio recinto. Así mesmo, a venda de localidades deberase organizar de maneira que non se produzan altercados. As localidades para acontecementos de alto risco non se deberán vender nas instalacións no mesmo día en que se vaian celebrar, salvo acordo co coordinador de seguridade.

Serán avisados todos os posibles espectadores o máis axiña posible e a través dos medios axeitados cando se esgoten todas as localidades para un acontecemento deportivo.

2. Todos os billetes de entrada en recintos deportivos nos cales estea instalado un sistema informatizado de control e xestión destes deberán adaptar o seu formato e características ás condicións técnicas exixibles para a súa compatibilidade co sistema instalado.

3. Nos supostos previstos no artigo 13.1 da Lei 19/2007, do 11 de xullo, a comprobación e seguimento da identidade dos que adquiren entradas ou o control da distribución de localidades realizarase implantando sistemas de venda de entradas nominativas e desenvolvendo procedementos que permitan supervisar a distribución de localidades asignadas e coñecer a identidade dos posuidores de títulos de acceso ás instalacións deportivas.

O tratamento dos datos obtidos segundo estes procedementos limitarase a proporcionar información sobre os que accedan ou pretendan acceder aos recintos deportivos, coa finalidade de garantir o cumprimento das prohibicións existentes e, de ser o caso, establecer as responsabilidades que procederen.

Os organizadores cancelarán os datos das persoas que accederon ao espectáculo deportivo cando este conclúa, conservando exclusivamente os datos necesarios para identificar as que poderían ter realizado condutas prohibidas pola Lei 19/2007, do 11 de xullo, que só lles poderán ser cedidos ás autoridades ou órganos competentes en materia de seguridade pública.

4. En circunstancias excepcionais de especial dificultade para o normal desenvolvemento da competición, o coordinador de seguridade poderá ditar instrucións en relación coa venda das entradas, o seu número e localización, co obxecto de previr afeccións á seguridade dos mesmos ou resolver os defectos que poidan provir da inadecuación de zonas ou partes da instalación deportiva.

Así mesmo, poderase limitar o número de localidades que se van poder adquirir por persoa nos despachos de billetes do recinto deportivo, igual que as que se poñan á venda para os espectadores visitantes.

De estas decisións afectaren entradas xa comercializadas, as instrucións poderán conter previsións sobre a redistribución dos espectadores.

Artigo 16. *Formato e características.*

1. Será responsabilidade dos organizadores de espectáculos deportivos a impresión dos billetes de entrada, de forma que estes respondan ás características regulamentariamente establecidas.

2. O formato e características técnicas dos billetes de entrada, en canto a tamaño, papel, tinguiduras e demais materiais utilizados na súa impresión, deberán reunir as condicións necesarias para impedir ou dificultar na maior medida posible a súa copia ou falsificación.

3. Todos os billetes de entrada que correspondan a unha mesma competición, torneo ou modalidade de organización de eventos deportivos deberán responder a un único formato e ter características comúns.

Artigo 17. *Obrigas dos espectadores respecto dos billetes de entrada.*

1. Toda persoa que pretenda acceder a un recinto deportivo deberá ser portadora dun billete de entrada expedido a título individual, de billete múltiple, de abono ou de calquera outro título que autorice os interesados a acceder a un espectáculo ou a máis dun.

2. Os espectadores deben ocupar as localidades da clase e lugar que se corresponda cos billetes de entrada de que sexan portadores.

3. Cada espectador está obrigado a conservar o seu billete de entrada ata a súa saída do recinto deportivo, debendo presentalo por requirimento de calquera empregado ou colaborador do organizador, así como ás forzas e corpos de seguridade do Estado.

4. Se, requirido para facelo, un espectador non presentar o billete de entrada, deberá optar por adquirir un no despacho de billetes, aboando o seu prezo se estiver dispoñible. En caso contrario, deberá abandonar inmediatamente o recinto deportivo.

Artigo 18. *Numeración e control dos billetes de entrada.*

1. Os billetes de entrada compóranse de dúas partes: unha, a entrada, destinada ao espectador; e outra, a matriz, destinada ao control.
2. Os billetes de entrada deberán estar correlativamente numerados por clases e corresponder os números das matrices cos das entradas.
3. Os billetes de entrada deberán ser, así mesmo, impresos en series de numeración continua, correlativa e independente para cada acontecemento ou espectáculo deportivo.
4. O número de billetes de entrada que fose obxecto de impresión non poderá ser superior á capacidade do recinto deportivo, debendo corresponder o número de entradas expedidas e mais os billetes múltiples ou abonos co de espectadores que entrasen no recinto.

Artigo 19. *Clases e tipos de billetes de entrada.*

Os billetes de entrada poderán ser das seguintes clases e tipos:

- a) Clases: clasificaranse en función da natureza das localidades e da súa localización no recinto deportivo. As distintas clases de localidades e a súa localización deberanse reflectir nun plano do recinto deportivo, o cal deberá estar exposto publicamente de forma permanente nos despachos de billetes instalados no propio recinto.
- b) Tipos: clasificaranse en función do prezo, para cada unha das clases, en:
 - 1.º Ordinarios, sen ningunha especialidade.
 - 2.º Reducidos, cun prezo inferior ao ordinario dos billetes de entrada para a mesma clase de localidades e que será ofertado a persoas que pertencen a grupos ou colectivos sociais, previamente determinados polo organizador.

Artigo 20. *Anverso e reverso das entradas.*

1. As entradas deberán conter no anverso os seguintes datos de identificación:
 - a) Numeración correspondente.
 - b) Recinto deportivo.
 - c) Clase de competición, torneo e organizador.
 - d) Evento deportivo, organizador deste e clubs, sociedades ou entidades participantes.
 - e) Clase e tipo de localidade.
 - f) Portas de acceso ao recinto.
2. As entradas indicarán no seu reverso que o recinto deportivo é unha zona videovixiada para a seguridade dos asistentes e participantes no encontro, e especificarán as causas que impiden o acceso ao recinto deportivo ou a permanencia nel, incorporando expresamente, como mínimo, as seguintes:
 - a) Participar en altercados, disputas, pelexas ou desordes públicas.
 - b) Introducir, portar ou utilizar calquera clase de armas ou de obxectos que poidan producir os mesmos efectos, como elementos punzantes, cortantes, ou de peso superior a 500 gramos/mililitros susceptibles de ser utilizados como proxectís, tales como alimentos en recipientes ríxidos, bebidas embotelladas ou os seus envases.
 - c) Introducir ou estar en posesión de bengalas, petardos, explosivos ou, en xeral, produtos inflamables, fumíferos ou corrosivos e dispositivos pirotécnicos.
 - d) Atoparse baixo os efectos de bebidas alcohólicas, estupefacientes, psicotrópicos, estimulantes ou substancias análogas.
 - e) Introducir ou vender calquera clase de bebidas alcohólicas, substancias estupefacientes, psicotrópicas, estimulantes ou análogas.
 - f) Introducir, exhibir ou elaborar pancartas, bandeiras, símbolos ou outros sinais con mensaxes que inciten á violencia ou ao terrorismo, ou en virtude dos cales unha persoa ou

grupo delas sexa ameazada, insultada ou vexada por razón da súa orixe racial ou étnica, relixión ou conviccións, discapacidade, idade, sexo ou orientación sexual.

g) Realizar cánticos, expresións, sons ou actitudes que inciten á violencia ou ao terrorismo, ou que pretendan vexar unha persoa ou grupo delas por razón da súa raza ou etnia, discapacidade, relixión ou conviccións, sexo ou orientación sexual.

h) Irromper no terreo de xogo.

i) Ter sido sancionado coa prohibición de acceso a calquera recinto deportivo mentres non se extingue a sanción.

j) Prezo da entrada e tributos que graven a operación.

3. Os organizadores están obrigados a fixar un ou varios carteis ou taboleiros no mesmo lugar onde estean instalados os despachos de billetes, así como en cada unha das portas de acceso ao recinto deportivo, nos cales, e de maneira que sexa facilmente visible desde o exterior do recinto, se fagan constar todas e cada unha das causas de prohibición de acceso ao propio recinto.

4. Co fin de que toda persoa que acceda ao recinto deportivo estea suficientemente informada sobre as condicións de acceso a este, nas portas do recinto exhibiranse carteis que conteñan o que se prevé no número 2 deste artigo.

5. Cando se adopten as medidas de seguimento e control da identidade de adquirentes de entradas e de posuidores de títulos de acceso aos espectáculos deportivos previstos no artigo 15.3 deste regulamento, inserirase nos billetes de entrada información acerca do tratamento dos datos de carácter persoal derivados da adquisición e do seu control, así como dos procedementos a través dos cales se verificará a dita identidade.

Sección 3.^a Actuacións respecto do libro de rexistro de actividades de seguidores e información

Artigo 21. Obriga xeral. Libro de rexistro de actividades de seguidores.

1. As entidades deportivas e as persoas organizadoras de espectáculos deportivos, no sentido en que son definidas ambas polo artigo 2 da Lei 19/2007, do 11 de xullo, están obrigados a prestar a máxima colaboración ás autoridades gubernativas para a prevención da violencia no deporte, pondo á disposición do coordinador de seguridade os elementos materiais e humanos necesarios e adoptando as medidas de prevención e control establecidas pola lei e por este regulamento.

2. Os organizadores responsables designarán un representante de seguridade, quen, no exercicio das súas tarefas durante o acontecemento deportivo, se aterá ás instrucións do coordinador de seguridade. Este representante deberá ser director de seguridade, de acordo coa normativa sobre seguridade privada.

3. Os clubs, entes de promoción deportiva, sociedades anónimas deportivas e as persoas organizadoras das competicións e espectáculos deportivos que realicen actividades incluídas dentro do ámbito de aplicación deste real decreto deberán elaborar e manter un libro de rexistro que conteña información xenérica e identificativa sobre a actividade das peñas, asociacións, agrupacións ou grupos de afeccionados que presten a súa adhesión ou apoio á entidade en cuestión, conforme o disposto no artigo 9 da Lei 19/2007, do 11 de xullo. Así mesmo, están obrigados a elaborar e manter o libro de rexistro as entidades deportivas e as persoas organizadoras de competicións e espectáculos deportivos que adicionalmente estableza a Comisión Estatal contra a Violencia, o Racismo, a Xenofobia e a Intolerancia no Deporte.

4. Inscribíranse no libro de rexistro os datos relativos:

a) Ás entidades formalmente dotadas de personalidade xurídica que estean recoñecidas pola entidade deportiva como peña ou similar.

b) Ás entidades ou grupos de afeccionados que carezan de personalidade xurídica pero se atopen recoñecidos pola entidade deportiva como peña ou similar.

c) Ás persoas físicas ou xurídicas que formalmente colaboren ou reciban apoio do club ou persoa organizadora de competicións e espectáculos deportivos, xa se trate de medios técnicos, económicos, materiais, informáticos ou tecnolóxicos, como os seguintes:

- 1.º A cesión de instalacións.
- 2.º A concesión de axudas económicas ou incentivos, incluídas entradas gratuítas ou descontos especiais.
- 3.º A facilitación de loxística para o transporte organizado a espectáculos deportivos.
- 4.º A cesión de seccións ou de espazos nos medios de difusión mantidos polo club ou entidade, xa se trate de emisións radiofónicas, televisivas ou realizados por medios electrónicos, ou a inclusión de enlaces ou vínculos desde a sede electrónica do club ou entidade aos medios electrónicos sostidos polas ditas persoas.

5. Os clubs e entidades a que fai referencia este artigo poderán inscribir adicionalmente no libro de rexistro outros afeccionados ou grupos de afeccionados que garden vinculación coa entidade sen encontrarse incluídos nas categorías anteriores e cuxas actividades poidan ser entendidas por ela como relevantes para efectos de inscrición para previr a violencia, o racismo, a xenofobia e a intolerancia no deporte.

Para estes efectos, incluíranse os afeccionados ou grupos de afeccionados que, por escisión, segregación ou por calquera variación na composición ou estrutura dos grupos mencionados no número anterior, desenvolvan unha actividade similar ou análoga á desenvolvida pola súa matriz. Así mesmo, inscribíranse os afeccionados ou agrupacións de afeccionados que, malia non manteren vínculos estables ou permanentes como os organizadores, tomasen parte en episodios violentos asociados ao deporte.

6. A información contida no libro de rexistro estará á disposición do coordinador de seguridade e da Comisión Estatal contra a Violencia, o Racismo, a Xenofobia e a Intolerancia no Deporte, e seralle facilitada á autoridade gubernativa cando así se requira. A utilidade da dita información para efectos de localizar as persoas infractoras do réxime sancionador establecido na Lei 19/2007, do 11 de xullo, será un elemento relevante para graduar a responsabilidade en que puiden incurrir a entidade, conforme o disposto no artigo 27.1 b) da citada lei.

7. A xestión deficiente ou a inexistencia do libro de rexistro a que fai referencia este artigo constitúe unha infracción grave de acordo co previsto no artigo 21.2.d) da Lei 19/2007, do 11 de xullo.

8. Tanto o libro de rexistro de seguidores como, de ser o caso, as bases de datos que se lle asocien se inscribíran como ficheiro na Axencia Española de Protección de Datos e serán obxecto do tratamento adecuado á lexislación vixente en materia de protección de datos de carácter persoal.

Artigo 22. *Características do libro de rexistro de seguidores.*

O libro de rexistro de seguidores a que fai referencia o artigo 9 da Lei 19/2007, do 11 de xullo, e que regula o artigo 21 deste regulamento, responderá ás seguintes características:

- a) O libro consistirá nunha serie de fichas numeradas e dilixenciadas polo secretario da entidade.
- b) Cada unha das persoas e entidades relacionadas no artigo 21, números 4 e 5 deste regulamento, disporá dunha ficha individual no libro de rexistro.
- c) Cada ficha conterá a seguinte información:

1.º O nome e apelidos, o documento nacional de identidade, o domicilio completo e, de ser o caso, o número de socio ou abonado das persoas físicas.

2.º A denominación da peña, entidade, grupo de afeccionados ou persoa xurídica obxecto de inscrición, así como os datos do seu representante legal ou, no caso de grupos

carentes de personalidade xurídica, da persoa que o represente nas súas relacións co club ou entidade deportiva, que comprenderán a información detallada na alínea a) anterior.

3.º As medidas de apoio relacionadas no artigo 21, número 4, alínea c) deste regulamento que o club ou entidade deportiva preste ao grupo de seguidores, que se deberán introducir no libro de rexistro cada vez que se produzan, ou ser obxecto dunha inscrición xenérica se teñen carácter continuado.

d) Os clubs e entidades responsables de levar o libro de rexistro poderán asociar a el unha base de datos en que se inclúa información máis pormenorizada sobre os grupos de seguidores, a súa composición, organización, comportamento, evolución, plans de desprazamento, axencias de viaxe que utilicen, medios de transporte, localidades vendidas aos seus integrantes, espazos reservados a estes no recinto deportivo e, en xeral, a información a que se refire o artigo 3.2.e) da Lei 19/2007, do 11 de xullo.

Cando o emprego desta información contribúa a identificar e localizar os suxeitos responsables de infraccións, será tomado en consideración para efectos de graduar a responsabilidade do organizador de acordo co establecido polo artigo 27.1.b) da Lei 19/2007, do 11 de xullo.

e) O libro poderase confeccionar en calquera soporte que permita deixar constancia dos datos que o conforman e da data en que se inscriben. Se se elabora e mantén en soporte informático, articularanse os medios técnicos para que quede constancia das inscricións que se realicen e da data en que teñen lugar, xa sexa para abrir unha nova ficha, xa para introducir ou modificar datos en fichas xa existentes.

f) A Comisión Estatal contra a Violencia, o Racismo, a Xenofobia e a Intolerancia no Deporte subministrarlles os impresos, formularios ou modelos para a elaboración e mantemento do libro de rexistro aos clubs e entidades responsables de os levar, co fin de normalizar e unificar a información».

Artigo 23. *Información sobre grupos de seguidores.*

1. As persoas organizadoras e as entidades deportivas participantes nos encontros incluídos no ámbito de aplicación da Lei 19/2007, do 11 de xullo, e deste regulamento subministrarlle á persoa responsable da coordinación de seguridade, ademais da información contida nos libros de rexistro de seguidores, toda a información que teñan dispoñible sobre organización, comportamento e evolución dos grupos de seguidores do equipo.

2. Así mesmo, comunicarlle ao coordinador a información de que dispoñan sobre os plans e organización de desprazamentos de seguidores desde o lugar de orixe, ante a celebración de acontecementos deportivos concretos, axencias de viaxes que utilicen, medios de transporte, localidades vendidas, espazos reservados no recinto deportivo, as súas reaccións ante as medidas e decisións policiais e calquera outra información significativa para efectos de prevención dos actos racistas, violentos, xenófobos ou intolerantes, nos termos descritos nos números primeiro e segundo do artigo 2 da Lei 19/2007, do 11 de xullo.

Sección 4.ª Alto risco

Artigo 24. *Alto risco.*

1. As federacións deportivas españolas e as ligas profesionais deberanlle comunicar á autoridade gubernativa, cunha antelación mínima de oito días, a programación dos encontros considerados de alto risco de acordo cos criterios que estableza o Ministerio do Interior.

2. A declaración dun encontro como de alto risco corresponderalle á Comisión Estatal contra a Violencia, o Racismo, a Xenofobia e a Intolerancia no Deporte, ben por proposta previa das federacións deportivas e ligas profesionais prevista no parágrafo anterior ou

ben como consecuencia da súa propia decisión, e implicará a obriga dos clubs e sociedades anónimas deportivas de reforzaren as medidas de seguridade nestes casos, que comprenderán como mínimo:

- a) Sistema de venda de entradas.
- b) Separación das afeccións rivais en zonas distintas do recinto.
- c) Control de acceso para o estrito cumprimento das prohibicións existentes.
- d) As medidas previstas no artigo 6 da Lei 19/2007, do 11 de xullo, que se xulguen necesarias para o normal desenvolvemento da actividade.

Sección 5.^a Produtos que se introduzan ou expendan nas instalacións deportivas

Artigo 25. Condicións dos produtos que se introduzan ou expendan nos recintos deportivos durante a celebración de espectáculos.

1. Os envases de bebidas, alimentos e demais produtos que se introduzan para seren expendidos nas instalacións ou recintos deportivos poderán reunir, dentro das establecidas con carácter xeral, calquera condición de rixidez e capacidade, sempre que a súa localización, expendición, venda e consumo teñan lugar única e exclusivamente nos almacéns, establecementos de venda, cafetarías, bares, tabernas, restaurantes ou similares, instalados no interior do recinto deportivo.

2. Os envases das bebidas, alimentos e demais produtos que se expendan ou sexan obxecto de venda ao público no interior das instalacións deportivas, fóra dos almacéns ou locais indicados no número anterior, non poderán ser recipientes de metal, vidro, cerámica, madeira ou calquera outro material similar.

3. Prohíbese a venda e introdución no recinto deportivo de:

a) Bebidas embotelladas, que se deberán servir en vasos ou xerras de plástico, papel plastificado ou outro material similar antes de seren retiradas polo consumidor do mostrador de venda ou do expendedor.

b) Calquera clase de armas ou de obxectos que puideren producir os mesmos efectos, así como bengalas, petardos, explosivos ou, en xeral, produtos inflamables, fumíferos ou corrosivos e dispositivos pirotécnicos.

c) Produtos que superen os 500 gramos de peso ou 500 mililitros de volume e poidan ser utilizados como elementos arreboladizos.

4. Cando as persoas que desexen vender nos recintos deportivos produtos que superen as medidas de peso ou volume que se establecen na alínea c) do número anterior teñan dúbidas acerca da súa posible utilidade como elemento arreboladizo, poderanlle solicitar un informe á Subdelegación do Goberno, xuntando á solicitude as características do produto. O informe poderá ser específico para un produto concreto ou xeral para toda unha serie de produtos dun mesmo tipo, e será emitido no prazo máximo de dous meses. O seu sentido entenderase favorable se se supera ese prazo sen notificación ao interesado.

5. Prohíbese a introdución ou tenza polo público en xeral de:

a) Envases de bebidas, alimentos e demais produtos que sexan de metal, vidro, cerámica, madeira ou calquera outro material similar.

b) Bebidas embotelladas adquiridas nos recintos deportivos, permitíndose os vasos ou xerras de plástico, papel plastificado ou outro material similar.

c) Calquera clase de armas ou de obxectos que puideren producir os mesmos efectos, así como bengalas, petardos, explosivos ou, en xeral, produtos inflamables, fumíferos ou corrosivos e dispositivos pirotécnicos.

d) Produtos que superen os 500 gramos de peso ou 500 mililitros de volume e poidan ser utilizados como elementos arreboladizos, salvo que o produto en concreto ou, de ser o caso, produtos do mesmo tipo teñan permitida a súa expedición e venda de acordo co número 4 deste artigo.

- e) Calquera clase de bebida alcohólica.
- f) Introducir substancias estupefacientes, psicotrópicas, estimulantes ou análogas.

Artigo 26. *Previsións contractuais e responsabilidade.*

1. Os actos ou contratos, calquera que sexa a forma xurídica que revistan, por virtude dos cales se permita ou conceda a explotación dos establecementos instalados no interior do recinto, deberán incluír no seu contido ou cláusulas a totalidade das previsións contidas no artigo anterior.

2. A responsabilidade pola expendición das bebidas, alimentos e demais produtos que incumpran as normas sobre condicións de rixidez e capacidade dos envases corresponderá aos que a efectúen.

Os organizadores de espectáculos deportivos en que se produzan as situacións definidas no parágrafo anterior poderán ser igualmente sancionados cando se incumprisen as medidas de vixilancia e control.

3. A concreta determinación e imputación da responsabilidade fixarase de acordo coas previsións do título II da Lei 19/2007, do 11 de xullo.

Sección 6.ª Cometidos e obrigas do persoal ao servizo dos organizadores

Artigo 27. *Director de seguridade.*

De conformidade co disposto no artigo 16 da Lei 23/1992, do 30 de xullo, de seguridade privada, así como no seu regulamento, aprobado polo Real decreto 2364/1994, do 9 de decembro, nos recintos onde se celebren competicións de categoría profesional de fútbol e naqueloutros que regulamentariamente se determinen, o consello de administración ou a xunta directiva designarán un director de seguridade que, no exercicio das funcións que lle son propias, estará sometido á autoridade do coordinador de seguridade e seguirá as súas instrucións en canto afecte a seguridade do acontecemento deportivo.

Artigo 28. *Efectividade das obrigas legais.*

1. Para garantir o cumprimento das obrigas legais, os organizadores disporán do persoal e dos medios adecuados para lles impedir aos asistentes introducir ou ter no recinto pancartas, símbolos, emblemas ou lendas que impliquen unha incitación á violencia, ao racismo, á xenofobia ou á intolerancia; bebidas alcohólicas, e bebidas ou alimentos de calquera clase cuxa introdución e tenza estea prohibida conforme o artigo 25 deste regulamento.

2. Así mesmo, adoptarán as previsións oportunas para lles impedir o acceso a cantos traten de introducir no recinto armas ou obxectos susceptibles de seren utilizados como tales, bengalas e fogos de artificio, ou presenten síntomas de se atoparen baixo os efectos de bebidas alcohólicas, estupefacientes, psicotrópicos, estimulantes ou substancias análogas.

3. Queda prohibida nas instalacións en que se celebren competicións deportivas, e os organizadores serán responsables do cumprimento da prohibición, a introdución e venda de toda clase de bebidas alcohólicas. Considéranse bebidas non alcohólicas aquelas non fermentadas, carbónicas ou non, preparadas con auga potable ou mineral, ingredientes, características e demais produtos autorizados, e enténdese por bebidas alcohólicas aquelas que en volume presenten unha graduación alcohólica, en graos centesimais, superior ao 1 por 100.

4. O persoal do club ou da sociedade anónima deportiva impedirá a exhibición e retirará con carácter inmediato calquera tipo de pancarta ou similar que se exhiba nas bancadas incitando á violencia, así como calquera clase de bebida, produto ou alimento contrario ás prohibicións anteriores.

Artigo 29. *Prohibición de acceso ou expulsión do recinto.*

1. Os clubs, sociedades anónimas deportivas ou organizadores establecerán os mecanismos necesarios para facer efectiva, por medio do seu persoal e/ou medios técnicos ao seu alcance, a prohibición de acceso das persoas que fosen sancionadas coa dita prohibición e cuxa identificación lles fose previamente facilitada polas autoridades gubernativas ou polo coordinador de seguridade, así como, de ser o caso, a expulsión do recinto.

2. Para o cumprimento das obrigas legais que se refiren no artigo 28 e neste, o persoal dos organizadores poderá instar o apoio dos membros das forzas e corpos de seguridade que se atopen presentes.

Artigo 30. *Separación de afeccións de equipos contendentes.*

1. O club ou sociedade anónima deportiva organizadora dos encontros correspondentes a competicións de categoría profesional establecerá un sistema que permita dirixir e acomodar os compoñentes de afeccións dos equipos contendentes, situándoos nos espazos dispostos para iso, co fin de que estean separadas.

2. Nos encontros doutro nivel, os organizadores tamén deberán adoptar as medidas necesarias para separar adecuadamente nos recintos os grupos de seguidores que puideren orixinar enfrontamentos violentos.

Artigo 31. *Uso de dispositivos pirotécnicos en acontecementos deportivos.*

De acordo coas normas que ao respecto establezan as administracións competentes, só se poderán utilizar dispositivos pirotécnicos nos recintos deportivos tras acordo previo co coordinador de seguridade, que adoptará as medidas pertinentes, e sempre que se cumpran as condicións seguintes:

- a) En cerimonias de apertura e clausura, durante o descanso ou despois do encontro.
- b) Fóra das bancadas ou dos valos que as rodeen.
- c) Que o manexo dos dispositivos pirotécnicos o realicen profesionais autorizados para iso, designados polo organizador do encontro.

Artigo 32. *Acompañamento de seguridade.*

Nos encontros cualificados de alto risco, tanto de carácter nacional como internacional, os grupos de seguidores serán acompañados por encargados que para o efecto dispoña o club ou a sociedade anónima deportiva do equipo visitante, que, coa antelación mínima de oito días, llo comunicará ao coordinador de seguridade.

Artigo 33. *Formación profesional. Simulacros e emerxencias.*

1. Os clubs e sociedades deportivas teñen obriga de lle proporcionar unha adecuada preparación profesional ao seu persoal fixo, así como ao contratado, para velar pola seguridade e o normal desenvolvemento dun acontecemento deportivo, o cal terá a obriga de adquirir a dita preparación, a través dos cursos que para tal efecto programen os responsables da organización policial, de acordo co disposto no artigo 53 deste regulamento coa asistencia técnica da Comisión Estatal contra a Violencia, o Racismo, a Xenofobia e a Intolerancia no Deporte, e que constituirá requisito para a súa admisión ou permanencia no desempeño das súas funcións.

2. Os acomodadores dos estadios recibirán cursos e instrucións especiais, impartidos polos clubs ou sociedades anónimas deportivas, sobre as súas tarefas específicas e concretamente sobre colocación de afeccións dos equipos contendentes nos lugares que lles estiveren reservados.

3. Os clubs ou sociedades anónimas deportivas organizarán simulacros de emerxencia cos recintos desocupados, polo menos unha vez ao ano, nos que deberá participar o seu persoal para adquirir a experiencia técnica necesaria.

Artigo 34. Agrupacións de voluntarios.

1. As agrupacións de voluntarios constituídas ao abeiro do artigo 19 da Lei 19/2007, do 11 de xullo, terán o marco de actuación, as funcións informativas, sistemas de identificación, dereitos e obrigas, selección, formación e perfeccionamento dos seus membros que se determinen na forma regulamentariamente prevista, por instancia da Comisión Estatal contra a Violencia, o Racismo, a Xenofobia e a Intolerancia no Deporte.

2. Os membros destas agrupacións, na súa actuación nos acontecementos deportivos, seguirán as instrucións que para o efecto impartan o coordinador de seguridade e o director de seguridade da organización.

CAPÍTULO III

Funcións das forzas e corpos de seguridade

Sección 1.^a Disposicións preventivas e cautelares de carácter xeral

Artigo 35. Funcións en materia de espectáculos deportivos.

As forzas e corpos de seguridade desenvolverán en materia de espectáculos deportivos as funcións que se determinan na Lei 19/2007, do 11 de xullo, e neste regulamento, ademais das competencias xerais que teñen asignadas nas súas normas específicas, na Lei orgánica 1/1992, do 21 de febreiro, sobre protección da seguridade cidadá, e no Real decreto 2816/1982, do 27 de agosto, polo que se aproba o Regulamento xeral de policía de espectáculos públicos e actividades recreativas.

Artigo 36. Cualificación do risco.

1. Os centros directivos responsables das organizacións policiais colaborarán na determinación das variables que cómpre ter en conta para cualificar, segundo o baremo establecido, o risco de todo acontecemento deportivo.

2. O sistema de baremos será establecido oficialmente e revisado anualmente, por proposta dos responsables policiais, polo Ministerio do Interior, tras informe previo da Comisión Estatal contra a Violencia, o Racismo, a Xenofobia e a Intolerancia no Deporte.

3. Unha vez fixado ou revisado o sistema de avaliación aplicable, comunicáraselles ás federacións deportivas e ligas profesionais e tamén aos clubs, sociedades anónimas deportivas ou organizadores de espectáculos deportivos para que poidan cualificar o nivel de risco de todos aqueles acontecementos deportivos en que interveñan.

4. A información e as valoracións que se obteñan en aplicación dos mecanismos previstos nos números anteriores serán as que se terán en conta na elaboración e aprobación dos plans individuais de riscos a que se refire o artigo 7 deste regulamento.

Artigo 37. Tarefas informativas.

1. Os servizos competentes dos centros directivos responsables das organizacións policiais na forma prevista no artigo 6.1 deste regulamento reunirán a información necesaria sobre grupos violentos en espectáculos deportivos, de modo que ante un acontecemento concreto se dispoña de elementos de xuízo para previr posibles actuacións violentas.

2. A información sobre o seguimento dos grupos violentos e a dinámica dos seus comportamentos porase á disposición do Ministerio do Interior ou do coordinador xeral de seguridade, de ser o caso, para que llela transmitan a todos os responsables da seguridade nos espectáculos deportivos.

Artigo 38. *Rede preventiva de control.*

Os responsables policiais da seguridade nos espectáculos deportivos colaborarán estreitamente, intercambiando a información dispoñible, directamente ou a través das autoridades gubernativas, constituíndo unha rede preventiva de control dos grupos violentos tanto nacionais como estranxeiros.

Artigo 39. *Planos de instalacións e chaves mestras.*

Os servizos policiais actuantes disporán de chaves mestras do recinto para apertura de portas e accesos ao seu interior, así como de planos de todas as instalacións, todo o cal deberá ser facilitado polos clubs, sociedades anónimas deportivas ou organizadores.

Artigo 40. *Reunións previas.*

Todo acontecemento deportivo cualificado de alto risco determinará a realización de cantas reunións previas estimen necesarias o coordinador de seguridade e os demais responsables da organización policial, debendo participar o representante dos organizadores e os responsables dos servizos que se prevexa que vaian actuar, en función do risco, como policía municipal, bombeiros, protección civil e Cruz Vermella, para a concreción e execución das previsións contidas no plan individual de riscos e as que, de ser o caso, poida adoptar o delegado do Goberno, procedéndose á delimitación de zonas de actuación e responsabilidade, dentro e fóra do recinto, antes, durante e despois do acontecemento.

Artigo 41. *Coordinación con outros servizos.*

1. Os servizos policiais actuantes coordinarán os demais servizos que participen no acontecemento deportivo, especialmente os mencionados no artigo anterior, as agrupacións de voluntarios e servizos sanitarios, así como os servizos operativos de seguridade privada do propio club ou sociedades anónimas deportivas.

2. Cando se trate de acontecementos deportivos que teñan lugar en comunidades autónomas que dispoñan de corpos de policía propios, os responsables policiais establecerán as oportunas relacións de información e colaboración.

3. Nos encontros internacionais, as autoridades gubernativas ou o coordinador xeral de seguridade, de ser o caso, manterán as conexións necesarias, previas ou simultáneas, cos responsables policiais do país organizador ou de procedencia do equipo visitante, para previr a comisión de actos violentos, racistas, xenófobos e intolerantes polos grupos seguidores que se despracen para os presenciar, intercambiando toda a información dispoñible ao respecto.

Sección 2.^a Medidas operativas, específicas e simultáneas

Artigo 42. *Dispositivo de seguridade.*

1. Cada acontecemento deportivo determinará a instrución e posta en marcha dun dispositivo de seguridade específico que garanta a mobilización dos recursos policiais necesarios en cada caso, para afrontar os movementos de violencia, tanto no interior como no exterior do recinto e zonas adxacentes a el.

2. Este dispositivo comprenderá medidas preventivas e cautelares sobre os grupos identificados como violentos, así como os servizos de apoio nos accesos e de vixilancia exterior ou interior que, en cada caso, acorden os responsables policiais e o coordinador de seguridade no club, sociedade anónima deportiva ou acontecemento de que se trate.

Artigo 43. *Protección de participantes e público.*

As forzas e corpos de seguridade serán directamente responsables da protección dos asistentes, participantes e equipos arbitrais, dentro e fóra do recinto deportivo e durante o

tránsito ata e desde este, e adoptarán para iso as medidas que resulten máis idóneas, atendendo ás circunstancias concorrentes en cada caso.

Artigo 44. Control de acceso ao recinto.

1. Nos accesos ao recinto que, a xuízo dos responsables policiais, resulten máis conflitivos, destacarase as unidades policiais intervinientes que se acordasen co coordinador de seguridade, para prestar servizo de apoio ao persoal de vixilancia do club ou sociedade anónima deportiva, e levar a cabo os controis que eviten a infracción das prohibicións legais existentes.

2. Cando se trate de encontros cualificados de alto risco, vixiaranse as colas dos despachos de billetes, evitando, en todo caso, a súa formación en liña perpendicular á porta nas horas inmediatamente anteriores á súa celebración.

Artigo 45. Control d-e alcoholemia e drogas.

Os responsables da organización policial disporán as medidas técnicas que permitan incorporar ao dispositivo de seguridade do recinto o control de alcoholemia e o daqueles en que se advirtan síntomas de se atopar baixo os efectos de estupefacientes, psicotrópicos, estimulantes ou substancias análogas. Estas medidas, unha vez determinadas, aplicaranse nas áreas neutralizadas a que se refire o artigo 48 deste regulamento.

Artigo 46. Supervisión de actuacións.

En especial, os ditos responsables policiais supervisarán as actuacións dos organizadores e do seu persoal no que se refire ás súas obrigas legais, e exixirán con todo rigor o cumprimento da prohibición de acceso, de acordo coas previsións contidas nos artigos 29 e 30 deste regulamento.

Artigo 47. Control de capacidade.

Cando se detecte un exceso de ocupación da capacidade do recinto que poida pór en perigo a seguridade dos asistentes, os servizos actuantes comunicaranllo de inmediato ao coordinador de seguridade, o cal en casos graves mesmo poderá acordar a suspensión do acto deportivo, logo de consulta previa co coordinador xeral de seguridade ou coa autoridade da que dependa directamente.

Artigo 48. Áreas neutralizadas.

Nas inmediacións dos recintos deportivos delimitaranse, por razóns de seguridade, sempre que sexa necesario, áreas neutralizadas con espazos acoutados e reservados, aos cales se impedirá o paso do público en xeral e que servirán como corredores de autoridades, como zona para situar as dotacións das forzas da orde, aparcadoiro de vehículos policiais ou permanencia de cabalos, ou para efectuar os controis a que se refire o artigo 45 deste regulamento e as demais dilixencias e actuacións que decidan os responsables dos servizos policiais actuantes.

Artigo 49. Control de grupos de seguidores.

Os membros da organización policial asignados para o efecto disporán dos medios instrumentais necesarios para un efectivo control dos grupos de seguidores ata o recinto deportivo e de regreso deste.

Artigo 50. Oficinas móbiles de denuncias.

Nas proximidades dos recintos en que se celebren acontecementos deportivos cualificados de alto risco, montaranse oficinas móbiles de denuncias e equipos de recepción de detidos.

*Sección 3.ª Prácticas de capacitación*Artigo 51. *Emerxencias e simulacros.*

Os simulacros de emerxencias a que se refire o artigo 33.3 planificaranse en colaboración cos responsables das forzas e corpos de seguridade e practicaranse coa asistencia profesional das unidades policiais especializadas, solicitando o auxilio e colaboración de cantos participen nas tarefas de seguridade colectiva dos espectáculos deportivos.

Artigo 52. *Protección civil.*

Os servizos de protección civil prestaranlles toda a axuda posible ás unidades policiais para que os efectivos especializados na prevención da violencia nos espectáculos deportivos se manteñan ao día das disposicións técnicas e métodos de traballo que, para este obxecto e no ámbito da súa competencia, establezan as autoridades responsables de protección civil.

Artigo 53. *Actividades de capacitación.*

As autoridades gubernativas ou, de ser o caso, o coordinador xeral de seguridade, de acordo coas previsións da Comisión Estatal contra a Violencia, o Racismo, a Xenofobia e a Intolerancia no Deporte, organizarán cursos de orientación técnica e actividades de capacitación destinados aos responsables da seguridade privada contratados polos clubs ou sociedades anónimas deportivas e agrupacións de voluntarios que se constitúan, así como de formación e especialización de acomodadores e empregados dos organizadores de acontecementos deportivos.

CAPÍTULO IV

Autoridades gubernativas e coordinadores de seguridade*Sección 1.ª Organización*Artigo 54. *Disposicións xerais.*

1. En exercicio das competencias e responsabilidades que lles atribúen a Lei orgánica 1/1992, do 21 de febreiro, sobre protección da seguridade cidadá, e a Lei 19/2007, do 11 de xullo, o Ministerio do Interior, a delegación ou subdelegación do Goberno correspondente e as autoridades das comunidades autónomas que posúan competencia en materia de seguridade cidadá:

a) Realizarán as funcións de coordinación xeral previstas neste regulamento e poderán nomear coordinadores xerais de seguridade para territorios determinados ou para modalidades deportivas concretas e, dependendo funcionalmente deles, coordinadores para recintos ou acontecementos deportivos concretos, con atribucións limitadas ao ámbito da entidade ou evento de que se trate.

Así mesmo, e en defecto do anterior, poderán nomear coordinadores de seguridade noutras competicións profesionais ou de especial risco.

b) Co fin de garantir o cumprimento das sancións de inhabilitación para organizar espectáculos deportivos e de prohibición de acceso a calquera recinto deportivo, disporán a súa anotación no Rexistro Central a que fai referencia o capítulo VII deste regulamento.

2. Os diferentes corpos e forzas de seguridade actuarán coordinadamente no exercicio das súas respectivas competencias, para o cal se promoverá a constitución de órganos bilaterais de cooperación entre os corpos e forzas de seguridade do Estado e os das comunidades autónomas que posúan competencias en materia de seguridade cidadá,

co fin de compartir a información relevante na xestión dos dispositivos de seguridade dos espectáculos deportivos, especialmente os cualificados de alto risco, e en particular cando supoñan o traslado organizado de afeccións entre territorios cuxa competencia en materia de seguridade cidadá afecte administracións diferentes.

3. O tratamento dos datos que resulte necesario para o exercicio polas forzas e corpos de seguridade das funcións previstas na Lei 19/2007, do 11 de xullo, e este regulamento, así como a comunicación de datos que sexa precisa para o desenvolvemento das funcións de cooperación e coordinación previstas nas ditas normas, levarase a cabo conforme o disposto no artigo 22 da Lei orgánica 15/1999, do 13 de decembro, de protección de datos de carácter persoal.

Artigo 55. *Competencia.*

1. As autoridades gubernativas ou, de ser o caso, o coordinador xeral de seguridade asumirán as tarefas de dirección, organización, coordinación e control dos servizos de seguridade con ocasión de espectáculos deportivos.

2. O coordinador de seguridade en cada club, sociedade anónima deportiva ou acontecemento deportivo asumirá estas mesmas tarefas ao seu nivel, baixo a directa dependencia das xefaturas superiores de policía, comisarías provinciais ou locais, comandancias da Garda Civil, ou dos órganos policiais das comunidades autónomas que posúan competencia en materia de seguridade cidadá, segundo as demarcacións en que a cada corpo corresponda exercer as súas funcións.

Artigo 56. *Nomeamento.*

Os coordinadores xerais e os de recintos ou acontecementos deportivos concretos serán nomeados entre membros dos corpos Nacional de Policía, Garda Civil ou corpos policiais autonómicos, segundo proceda, por proposta do director xeral da Policía e da Garda Civil, xefes superiores, comisarios provinciais ou locais, primeiros xefes de comandancias da Garda Civil, ou dos órganos policiais das comunidades autónomas que posúan competencia en materia de seguridade cidadá.

Sección 2.ª Cometidos

Artigo 57. *Determinación de obxectivos.*

As autoridades gubernativas e, de ser o caso, os coordinadores xerais de seguridade asumirán a fixación de obxectivos e directrices, tanto da acción policial como da acción propia dos clubs ou sociedades anónimas deportivas, destinada a garantir a seguridade e o normal desenvolvemento dos espectáculos de que se trate, previndo especialmente a produción de sucesos catastróficos ou vandálicos.

Artigo 58. *Deseño do dispositivo de seguridade.*

Tendo en conta as orientacións da Comisión Estatal contra a Violencia, o Racismo, a Xenofobia e a Intolerancia no Deporte, as autoridades gubernativas ou os coordinadores xerais de seguridade deseñarán o marco de actuación xeral do dispositivo de seguridade ao que se deberán ater os servizos policiais e os responsables dos clubs ou sociedades anónimas deportivas, antes, durante e despois do acontecemento deportivo, dentro e fóra do recinto.

Artigo 59. *Funcións de coordinación xeral.*

Os responsables da coordinación xeral de seguridade exercerán especificamente as seguintes competencias:

a) Planificar os servizos de seguridade que, con carácter xeral, se deban establecer para a celebración de actos deportivos.

b) Coordinar os dispositivos de seguridade dos acontecementos deportivos, convocando as oportunas reunións cando as circunstancias ou a urxencia do caso así o requiran.

c) Supervisar a actuación dos coordinadores de seguridade en cada club, sociedade anónima deportiva ou acontecemento deportivo.

d) Fixar as variables que cómpre ter en conta para cualificar o risco dos acontecementos deportivos, segundo o baremo establecido.

e) Exercer as demais funcións de carácter xeral necesarias para a protección de persoas, instalacións ou bens con motivo dos acontecementos deportivos.

Artigo 60. *Relacións.*

No exercicio das funcións indicadas, os responsables da coordinación xeral de seguridade manterán as necesarias relacións de información e colaboración coas autoridades deportivas, centrais e autonómicas, así como cos responsables federativos, ligas profesionais e clubs ou sociedades anónimas deportivas de todos os ámbitos ou con calquera outra persoa ou entidade organizadora de acontecementos deportivos.

Artigo 61. *Funcións do coordinador de seguridade en cada club, sociedade anónima ou acontecemento deportivo.*

O coordinador de seguridade en cada club, sociedade anónima ou acontecemento deportivo deberá organizar o dispositivo de seguridade específico; manter as relacións e comunicacións necesarias co conselleiro delegado ou o representante do club e co respectivo xefe do servizo de seguridade; coordinar a actuación de todos os servizos que participen no evento deportivo en función do risco, especialmente policía municipal, bombeiros, protección civil, Cruz Vermella, agrupacións de voluntarios e servizos sanitarios, para o cal convocará cantas reunións sexan necesarias, exercendo especialmente as funcións que se indican a continuación.

a) Funcións que se desenvolverán no exterior do recinto:

1.º Dispor o servizo no exterior e inmediacións do recinto coas dotacións policiais determinadas polos responsables da organización policial.

2.º Ordenarlle ao xefe do servizo de seguridade e empregados do club ou sociedade anónima deportiva levar a efecto controis de asistentes nos accesos máis conflictivos.

3.º Controlar en todo momento o sistema de venda de billetes de entrada, de modo que a ocupación non supere a capacidade do recinto.

4.º Supervisar, en colaboración coas autoridades a que se refire o artigo 37.1 deste regulamento, o cumprimento estrito das obrigas correspondentes aos organizadores segundo o disposto nos artigos 28 e 29 deste regulamento.

5.º Dispor cos responsables dos servizos policiais o apoio máis adecuado para a efectividade das medidas adoptadas polos organizadores no recinto.

6.º Recomendar medidas para o acceso ordenado dos seguidores ao recinto.

b) Funcións que se desenvolverán no interior do recinto:

1.º Exercer a dirección da unidade de control organizativo nos termos que establece o número 3 do artigo 14 da Lei 19/2007, do 11 de xullo.

2.º Recoñecer previamente o recinto deportivo, prestando especial atención á compartimentación e separación das afeccións dos equipos contendentes e á localización de grupos presumiblemente violentos, racistas, xenófobos ou intolerantes nos acontecementos deportivos cualificados de alto risco a risco moderado.

3.º Dispor cos responsables dos servizos policiais o servizo de orde e o servizo de apoio axeitado no interior do recinto, determinando os efectivos policiais uniformados e de paisano que se vaian utilizar.

4.º Supervisar as actuacións dos responsables do club ou sociedades anónimas deportivas na localización das afeccións dos equipos contendentes nas zonas previamente reservadas para iso.

5.º Controlar que os organizadores fagan cumprir estritamente as prohibicións de venda de bebidas alcohólicas, armas e produtos similares, e as regras sobre envases de bebidas, alimentos ou calquera outro produto.

6.º Obrigar os responsables do recinto á retirada inmediata de pancartas e símbolos que inciten á violencia, o racismo, a xenofobia ou a intolerancia exhibidos polos espectadores ou asistentes.

7.º Manter contacto permanente coas unidades policiais intervinientes situadas no exterior do recinto e ter informados os seus responsables de cantas incidencias se estean a producir no campo e afecten a seguridade do acontecemento deportivo.

8.º Identificar, cos medios técnicos da unidade de control organizativo e do recinto deportivo, os grupos e persoas de actitudes violentas ou que provoquen as afeccións dos equipos contendentes.

9.º Recomendarlle ao público asistente, a través de megafonía, que respecte as medidas de seguridade colectiva.

10.º Supervisar no seu momento o desaloxo do recinto, procurando a súa normalidade.

c) Outras funcións:

1.º Remitir informe despois de cada acontecemento deportivo, con expresión das incidencias rexistradas, aos superiores ou autoridades de que dependan, analizando o servizo de seguridade prestado e propondo as modificacións pertinentes ou o emprego de novos métodos de actuación, para os efectos previstos nos artigos 36 e 37 deste regulamento.

2.º Propor a apertura de expediente sancionador aos propietarios das instalacións deportivas, clubs, sociedades anónimas deportivas ou organizadores, así como aos asistentes ao espectáculo que participasen en feitos tipificados como infracción, sen prexuízo das competencias que corresponden á Comisión Estatal contra a Violencia, o Racismo, a Xenofobia e a Intolerancia no Deporte.

3.º Respecto da suspensión do encontro ou proba e desaloxo total ou parcial do recinto, exercer as funcións que prevé o artigo 15 da Lei 19/2007, do 11 de xullo, de acordo, se é o caso, co protocolo previsto na alínea e) do número 1 do artigo 3 do Real decreto 748/2008.

CAPÍTULO V

A unidade de control organizativo

Artigo 62. *Definición.*

A unidade de control organizativo é o centro, dotado do conxunto de medios que se determinan nos artigos seguintes e adecuadamente situado nas instalacións deportivas, desde onde o coordinador exerce a dirección do dispositivo de seguridade, en todas as súas fases, durante o acontecemento deportivo, coa asistencia do responsable de seguridade deste, para facilitar o seu normal desenvolvemento.

Artigo 63. *Situación.*

A unidade de control organizativo estará situada nunha zona estratéxica e dominante do recinto deportivo, dispoñendo de bos accesos e comunicacións co interior e exterior do campo.

Artigo 64. *Localización dos responsables de seguridade.*

Os responsables superiores dos distintos servizos de seguridade, con presenza no interior dos recintos, situaranse nas instalacións desta unidade durante a celebración dos encontros deportivos.

Artigo 65. *Dotación.*

Cada unidade de control organizativo disporá, como mínimo, dos seguintes elementos: circuío pechado de televisión, megafonía e enlaces de radio e telecomunicación, así como os demais medios que resulten necesarios para o control do recinto.

Artigo 66. *Circuío pechado de televisión.*

1. Este circuío contará con cámaras fixas e móbiles.
2. As cámaras fixas controlarán o exterior e interior do recinto, cubrindo as zonas de acceso e as bancadas e proporcionando unha visión total daquel; nas competicións oficiais de carácter profesional de fútbol gravarán todo o conxunto de asistentes ao recinto ao longo de todo o espectáculo desde o comezo deste ata o abandono do público.
3. As cámaras móbiles situaranse nos espazos que o coordinador estime necesario controlar especialmente en cada acontecemento deportivo, dispondo, así mesmo, de medios de gravación para rexistrar as actitudes dos asistentes e o seu comportamento.
4. As gravacións efectuadas co circuío pechado de televisión conservaranse durante un mes, contado desde a conclusión do espectáculo, e destruíranse se, vencido ese prazo, non foren requiridas polas autoridades competentes para fins de investigación ou instrución de procedementos.
5. Nos accesos aos recintos deportivos que contén con sistemas de gravación de imaxes, colocaranse carteis informativos desta circunstancia conforme as instrucións da Axencia Española de Protección de Datos. Así mesmo, os organizadores terán á disposición dos interesados, nos termos previstos nas instrucións da Axencia Española de Protección de Datos, impresos en que se detalle a información prevista no artigo 5.1 da Lei orgánica 15/1999, do 13 de decembro, de protección de datos de carácter persoal.

Artigo 67. *Megafonía.*

1. A unidade de control organizativo terá un sistema de megafonía propio, con capacidade e alcance suficiente para o interior e exterior do recinto e con dispositivo de seguridade que permita anular o sistema xeral daquel.
2. O sistema de megafonía deberá estar dotado dos medios humanos necesarios para efectuar a tradución e emisión das indicacións, advertencias ou mensaxes que se teñan que efectuar en máis dun idioma.

Artigo 68. *Enlaces de radio e telecomunicacións.*

1. A emisora directora da unidade de control organizativo comprenderá as mallas integradas da rede de policía local, medios sanitarios e protección civil; as mallas das unidades das forzas e corpos de seguridade intervinientes do operativo policial, incluíndo as unidades polivalentes daquelas, as do distrito policial, as especiais, as de escolta, helicópteros e TEDAX, así como as mallas policiais do servizo integradas pola oficina de denuncias, medios sanitarios e centros de detidos.

As diversas organizacións que utilizan mallas de comunicacións distintas da do Corpo Nacional de Policía e a Garda Civil, como a policía local, protección civil ou servizos sanitarios, entre outros, deberán facilitar o material, a información e os medios técnicos para integrar as ditas mallas na REDE SIRDEE, de xeito que unha ou dúas terminais funcionarán como emisora directora da unidade de control organizativo.

2. A central telefónica da unidade de control organizativo contará coas extensións policiais exteriores e interiores que permitan, en todo momento, a comunicación libre con

persoal e institucións relacionadas coa seguridade colectiva dos asistentes e do público en xeral.

Artigo 69. *Persoal técnico.*

Os clubs, sociedades anónimas deportivas ou organizadores dos acontecementos deportivos proporcionarán o persoal especializado necesario para o mantemento e asistencia técnica de todas as instalacións integradas na unidade de control organizativo.

Artigo 70. *Financiamento.*

Serán de cargo dos propietarios das instalacións deportivas, sociedades anónimas deportivas ou clubs todos aqueles medios da unidade de control organizativo que requiran construcións, instalacións ou soportes fixos, mentres que lle corresponderá ao Ministerio do Interior a achega dos elementos móbiles que sexan de uso directo do coordinador de seguridade.

CAPÍTULO VI

Actas, informes e propostas

Artigo 71. *Acta do espectáculo.*

1. Finalizado o espectáculo deportivo, o coordinador de seguridade elaborará unha acta, coa participación dos responsables dos servizos enumerados nos artigos 40 e 41.1 e do conselleiro delegado ou representante do club, sociedade anónima deportiva ou organizador do espectáculo.

2. Na acta faranse constar:

- a) O desenvolvemento e aplicación do dispositivo de seguridade, antes, durante e despois do espectáculo.
- b) Os actos violentos, racistas, xenófobos e intolerantes e demais incidencias producidas, que sexan relevantes desde o punto de vista da seguridade.
- c) As manifestacións, suxestións ou propostas que estimen necesario formular os asistentes sobre o deseño e aplicación do dispositivo de seguridade.

3. Da acta faranse copias para os clubs, sociedades anónimas deportivas participantes ou organizadores, e para a Comisión Estatal contra a Violencia, o Racismo, a Xenofobia e a Intolerancia no Deporte, á que deberá ser enviada dentro das corenta e oito horas seguintes á celebración do espectáculo.

Artigo 72. *Avaliación de medios, actuacións e resultados.*

Unha vez concluídos os encontros cualificados de alto risco, os responsables dos servizos policiais actuantes analizarán os medios empregados, as actuacións realizadas e os resultados obtidos, e proporán, de ser o caso, a modificación dos sistemas operativos utilizados ou a adopción doutros novos para o sucesivo.

Artigo 73. *Informe xeral.*

Refundindo os distintos informes formulados polos coordinadores de seguridade nos diferentes clubs, sociedades anónimas e acontecementos deportivos, a Comisión Estatal contra a Violencia, o Racismo, a Xenofobia e a Intolerancia no Deporte realizará informes globais, coas análises xerais que procedan e as propostas correspondentes.

Artigo 74. *Propostas sancionadoras.*

1. De acordo coa acta que, de cada acontecemento deportivo, elaborase o coordinador de seguridade, e sen prexuízo das competencias da autoridade gubernativa, a Comisión

Estatal contra a Violencia, o Racismo, a Xenofobia e a Intolerancia no Deporte poderá elevar proposta motivada de instrución de expedientes sancionadores aos organizadores, espectadores e calquera outra persoa que, ao seu xuízo, puidese ter incorrido nalgunha das infraccións tipificadas na Lei 19/2007, do 11 de xullo.

2. A autoridade gubernativa tamén lle dará conta oportunamente á Comisión Estatal contra a Violencia, o Racismo, a Xenofobia e a Intolerancia no Deporte dos acordos de inicio dos procedementos tras disociación previa dos datos de carácter persoal contidos neles.

3. A Comisión Estatal contra a Violencia, o Racismo, a Xenofobia e a Intolerancia no Deporte actuará ao respecto de acordo co previsto neste regulamento e no Real decreto 748/2008, polo que se regula esta.

Artigo 75. Excesos da capacidade do recinto.

Daráselle conta á Administración tributaria, para os efectos oportunos, dos excesos que se produzan en cada caso na ocupación dos recintos respecto ás correspondentes capacidades, con independencia do expediente administrativo sancionador, para efectos de realizar a exacción tributaria que eventualmente puiden corresponder.

CAPÍTULO VII

Rexistro Central de Sancións

Artigo 76. Obxecto e adscrición.

1. Manterase un Rexistro Central de Sancións en materia de violencia, racismo, xenofobia e intolerancia no deporte –no sucesivo, o Rexistro– para inscribir as sancións impostas en aplicación do título II da Lei 19/2007, do 11 de xullo, e garantir o seu cumprimento.

2. Inscribíranse no Rexistro as sancións impostas polas autoridades estatais ou autonómicas competentes na materia, que comunicarán a resolución sancionadora e os datos obxecto de inscrición cando a sanción adquira firmeza en vía administrativa.

3. O rexistro adscríbese organicamente ao Ministerio do Interior, que terá a condición de responsable do ficheiro para os efectos previstos na normativa reguladora da protección de datos de carácter persoal e ante o cal se poderán exercer os dereitos de acceso, rectificación, cancelación e oposición.

Artigo 77. Protección de datos de carácter persoal.

1. O Rexistro en materia de violencia, racismo, xenofobia e intolerancia no deporte, así como a recollida e tratamento dos datos que se inscriban nel, axustaranse ao disposto na lexislación relativa á protección de datos de carácter persoal.

2. Asegurarase en todo caso o dereito das persoas que sexan obxecto de resolucións sancionadoras a seren informadas da súa inscrición no Rexistro e a que só se manteña o tempo necesario para a súa execución. Para tal fin, a autoridade sancionadora, ao mesmo tempo que realiza a transmisión dos datos ao Rexistro Central de Sancións para a súa correspondente anotación, comunicalle o dito trámite ao interesado.

3. De acordo coas disposicións vixentes na materia, terán acceso aos datos deste Rexistro os particulares que teñan un interese directo e manifesto, así como as entidades deportivas para efectos de colaboración coas autoridades no mantemento da seguridade pública con motivo de competicións ou espectáculos deportivos.

Artigo 78. Inscrición e cancelación das sancións.

1. Todo asento rexistral deberá conter, cando menos, as seguintes referencias:

a) Lugar e data do acontecemento deportivo, clase de competición e contendentes.

- b) Datos identificativos da entidade deportiva, organizador ou particular sancionado.
- c) Infracción cometida, especificando o artigo da lei en que está tipificada e, de ser o caso, as circunstancias modificativas da responsabilidade.
- d) Sanción ou sancións impostas, especificando o artigo da lei en que está tipificada, expresando con claridade o seu alcance temporal e xeográfico, e indicándose a data a partir da cal se inicie a execución efectiva da sanción, dato sen o cal non se poderá realizar a anotación.

2. Procederáse de oficio e inmediatamente á cancelación dos datos referidos a sancións inscritas tan pronto como se dese exacto cumprimento a elas durante a súa respectiva extensión temporal ou se notificase, de ser o caso, a estimación en vía xudicial do recurso interposto contra a resolución sancionadora.

Artigo 79. *Xestión do Rexistro.*

1. O encargado do Rexistro será directamente responsable do sistema de consulta e transmisión dos datos contidos nel.

2. As inscricións efectuadas no Rexistro desde o momento en que se produzan e ata a súa cancelación comunicaránse, cando así o soliciten, ao Consello Superior de Deportes, aos delegados e subdelegados do Goberno e aos órganos competentes das comunidades autónomas. As ditas inscricións comunicaránse, así mesmo, aos servizos das forzas e corpos de seguridade que a Dirección Xeral da Policía e da Garda Civil determine para a prevención dun perigo real para a seguridade pública no ámbito de aplicación da Lei 19/2007, do 11 de xullo, e deste regulamento.

Artigo 80. *Garantías de cumprimento das sancións de prohibición de acceso a recintos deportivos.*

1. Para efectos do cumprimento efectivo da sanción de prohibición de acceso a recintos deportivos, e conforme o disposto nos artigos 25.2 e 29.4 da Lei 19/2007, do 11 de xullo, adoptaranse as medidas reguladas neste artigo.

2. O Rexistro disporá dunha sección en que se inscribirán especificamente as sancións de prohibición de acceso a recintos deportivos.

3. As sancións obxecto de inscrición nesta sección serán comunicadas polo órgano sancionador ao propio Rexistro e aos organizadores dos espectáculos deportivos, especialmente os da provincia de que se trate, co fin de que estes poidan verificar a identidade nos controis de acceso.

4. Cando se trate de sancións impostas a persoas seguidoras das entidades deportivas por cometeren os ilícitos definidos nos números 1 e 2 do artigo 2 da Lei 19/2007, do 11 de xullo, o órgano sancionador notificarállelas ao club ou entidade deportiva a que pertencen, co fin de:

- a) Aplicar a prohibición de apoio que recolle o artigo 3, número 2, alínea h) da dita lei.
- b) Retirarlle o seu abono ou a condición de socio ou asociado durante todo o período de duración da sanción conforme o artigo 25.1 da dita lei.

5. Para efectos de cumprimento da sanción de prohibición de acceso, poderanse articular outros procedementos de verificación da identidade, que serán efectuados por membros das forzas e corpos de seguridade.

CAPÍTULO VIII

Medidas de apoio á convivencia e a integración no deporte*Sección 1.^a Medidas de carácter preventivo e formativo*

Artigo 81. *Do Plan de prevención da violencia, o racismo, a xenofobia e a intolerancia no deporte.*

1. De acordo co disposto no número 1 do artigo 16 da Lei 19/2007, do 11 de xullo, a Comisión Estatal contra a Violencia, o Racismo, a Xenofobia e a Intolerancia no Deporte aprobará con carácter bienal un plan que recollerá as medidas de carácter positivo que esta impulsará de cara á prevención da violencia, o racismo, a xenofobia e a intolerancia no deporte, atendendo aos aspectos sociais e educativos, podendo incluírse campañas publicitarias e de concienciación, elaboración de materiais didácticos, accións de formación e cantas actuacións contribúan a fomentar os valores formativos do deporte a través da convivencia e a integración intercultural por medio do deporte.

2. A execución das medidas concretas que se recollan no plan poderase articular a través de convenios coas comunidades autónomas, entidades locais, federacións deportivas españolas, ligas profesionais, asociacións de deportistas e cantos colectivos fomenten o xogo limpo, a paz e a convivencia intercultural a través do deporte.

Artigo 82. *Das convocatorias de axudas dirixidas á execución de medidas preventivas e formativas.*

1. De acordo co disposto no número 2 do artigo 16 da Lei 19/2007, do 11 de xullo, o Consello Superior de Deportes, mediante resolución do seu presidente e en réxime de publicidade, obxectividade e concorrencia competitiva, convocará axudas destinadas a financiar actividades que promovan a convivencia e a integración a través do deporte e a sensibilización sobre os riscos da violencia, o racismo, a xenofobia e a intolerancia no deporte.

2. Os beneficiarios poderán ser as persoas físicas e xurídicas tanto públicas como privadas, legalmente constituídas, así como as agrupacións de persoas físicas ou xurídicas, públicas ou privadas, as comunidades de bens ou calquera outro tipo de unidade económica ou patrimonio separado que, mesmo carecendo de personalidade xurídica, poidan levar a cabo todos ou algúns dos seguintes tipos de actividades:

a) Campañas que difundan a deportividade, o xogo limpo, a integración a través do deporte e o respecto mutuo entre deportistas, participantes e espectadores de competicións deportivas.

b) Xornadas, debates, coloquios e foros de opinión que promovan e fomenten boas prácticas e a sensibilización sobre a deportividade, o xogo limpo, a integración a través do deporte e o respecto mutuo.

c) A realización de estudos, informes e traballos de interese, sobre causas, efectos e alcance da violencia, o racismo, a xenofobia e a intolerancia no deporte.

d) Outro tipo de actividades de contido social e educativo, dirixidas á prevención da violencia, o racismo, a xenofobia e a intolerancia no deporte.

Sección 2.^a Do Observatorio da Violencia, o Racismo, a Xenofobia e a Intolerancia no Deporte

Artigo 83. *Natureza, obxecto e adscrición.*

1. O Observatorio da Violencia, o Racismo, a Xenofobia e a Intolerancia no Deporte é un órgano de carácter consultivo cuxo obxecto é desenvolver funcións de estudo, análise, proposta e seguimento en materia de prevención da violencia, o racismo, a xenofobia e a

intolerancia no deporte, de acordo co disposto a alínea d) do artigo 16 da Lei 19/2007, do 11 de xullo.

2. O Observatorio adscríbese organicamente ao Consello Superior de Deportes, a través da Dirección Xeral de Deportes.

Artigo 84. *Funcións.*

De acordo co disposto no número 1.d) do artigo 16 da Lei 19/2007, do 11 de xullo, en materia de prevención da violencia, o racismo, a xenofobia e a intolerancia no deporte, o Observatorio levará a cabo as seguintes funcións:

a) Constituír un fondo documental mediante a recompilación de datos estatísticos, e de estudos, informes, instrumentos internacionais, publicacións e outros documentos, calquera que sexa o seu soporte, que conteñan información de interese sobre a materia.

b) Realizar estudos dirixidos a analizar en que medida inflúen sobre o comportamento dos deportistas e os espectadores os factores tanto internos como externos do xogo.

c) Promover ante as autoridades gubernativas, as entidades deportivas, os medios de comunicación social e a sociedade civil a adopción das medidas derivadas dos estudos anteriores que contribúan á paz, a tolerancia e a convivencia no deporte e a erradicar deste a violencia, o racismo, a xenofobia e a intolerancia.

d) Emitir informe nos procedementos de elaboración das disposicións normativas relativas á prevención da violencia, o racismo, a xenofobia e a intolerancia no deporte, expresando a súa opinión e propondo as modificacións que estime convenientes.

e) Elaborar e proporlle ao Consello Superior de Deportes, con carácter bianual, un plan de actuacións en prevención da violencia, o racismo, a xenofobia e a intolerancia no deporte.

f) Colaborar con outros órganos, entidades e institucións internacionais, estatais, autonómicas, locais ou sociais que promovan os mesmos fins que o observatorio.

g) Cantas outras funcións se lle atribúan legal ou regulamentariamente, ou lle sexan encomendadas pola Comisión Estatal contra a Violencia, o Racismo, a Xenofobia e a Intolerancia no Deporte.

Artigo 85. *Composición.*

1. O director xeral de Deportes do Consello Superior de Deportes é o presidente do Observatorio, sen prexuízo de que poida delegar a presidencia das distintas reunións deste na persoa que designe para tal efecto.

2. Son vogais do Observatorio:

a) Dous representantes do Ministerio do Interior designados polo seu titular.

b) Tres representantes do Consello Superior de Deportes designados polo seu presidente, un dos cales actuará como secretario do observatorio.

c) Un representante da asociación de entidades locais españolas de maior implantación no ámbito estatal, nomeado pola Presidencia do Consello Superior de Deportes de entre os propostos por esta.

d) Un representante do Observatorio Español do Racismo e a Xenofobia, do Ministerio de Traballo e Inmigración, nomeado pola Presidencia do Consello Superior de Deportes de entre os propostos por este.

e) Dous representantes da Real Federación Española de Fútbol, nomeados pola Presidencia do Consello Superior de Deportes de entre os propostos por ela, sendo un deles representante do colectivo arbitral.

f) Un representante da Liga Nacional de Fútbol Profesional, nomeado pola Presidencia do Consello Superior de Deportes de entre os propostos por esta.

g) Un representante da asociación de futbolistas españois de maior implantación, nomeado pola Presidencia do Consello Superior de Deportes de entre os propostos por esta.

h) Un representante da Asociación Española da Prensa Deportiva, nomeado pola Presidencia do Consello Superior de Deportes, de entre os propostos por ela.

i) Un representante da asociación de peñas ou de afeccionados españois de maior implantación, nomeado pola Presidencia do Consello Superior de Deportes de entre os propostos por esta.

j) Dous representantes de organizacións non gobernamentais españolas de recoñecido prestixio na loita contra a violencia, o racismo, a xenofobia e a intolerancia, nomeados pola Presidencia do Consello Superior de Deportes.

k) Dous membros nomeados pola Presidencia do Consello Superior de Deportes de entre expertos de recoñecido prestixio en materia de prevención da violencia, o racismo, a xenofobia e a intolerancia no deporte.

l) Dous representantes de federacións deportivas españolas en que non exista liga profesional, nomeado pola Presidencia do Consello Superior de Deportes de entre os propostos por estas.

m) Un representante do Ministerio de Igualdade.

n) Un representante do Consello para a Promoción da Igualdade de Trato e a non Discriminación por Orixe Racial ou Étnica.

3. Na composición do Observatorio velarase pola paridade entre homes e mulleres, para o cal as propostas de nomeamento presentadas polas diferentes entidades que deban designar dous ou máis representantes incluírán necesariamente persoas de distinto sexo.

4. O presidente do Observatorio, por iniciativa propia ou por recomendación dalgún dos seus membros, pode acordar a asistencia doutras persoas ás reunións do Observatorio cando o estime conveniente para o logro dos seus fins.

Artigo 86. *Réxime de funcionamento.*

1. O Observatorio réxese polo disposto neste regulamento e pode ditar as súas propias normas de funcionamento de conformidade con el e suxeitándose, no non previsto por elas neste, ao disposto no capítulo II do título II da Lei 30/1992, do 26 de novembro, de réxime xurídico das administracións públicas e do procedemento administrativo común.

2. O Observatorio, a través da súa Presidencia, actuará en coordinación con outros órganos da Administración do Estado con competencias en materia de prevención da violencia, o racismo, a xenofobia e a intolerancia no deporte e, especialmente, coa Comisión Estatal contra a Violencia, o Racismo, a Xenofobia e a Intolerancia no Deporte.

Sección 3.ª Distintivo «Xogo Limpo»

Artigo 87. *Creación.*

1. Créase o distintivo «Xogo Limpo» no marco do artigo 16.1 c) da Lei 19/2007, do 11 de xullo, que se rexerá por este capítulo e polas súas disposicións de desenvolvemento.

2. O distintivo «Xogo Limpo» é unha mención honorífica concedida pola Presidencia do Consello Superior de Deportes por proposta da Comisión Estatal contra a Violencia, o Racismo, a Xenofobia e a Intolerancia no Deporte, para recoñecer a actitude de equipos deportivos, deportistas, técnicos, patrocinadores, medios de comunicación e de afeccións que se destacaron durante cada tempada deportiva pola súa conduta contra a violencia, o racismo, a xenofobia e a intolerancia e a favor da paz, a tolerancia e a convivencia no deporte.

3. A imaxe gráfica do distintivo establecerase mediante resolución da Presidencia do Consello Superior de Deportes.

Artigo 88. *Modalidades e regras de concesión.*

1. O distintivo terá seis modalidades:

- a) A equipos deportivos.
 - b) A afeccións.
 - c) A deportistas.
 - d) A técnicos.
 - e) A medios de comunicación.
 - f) A patrocinadores.
2. O distintivo concederáse:
- a) Nas competicións oficiais de carácter profesional de fútbol e baloncesto.
 - b) Noutras modalidades e competicións deportivas, por resolución da Presidencia do Consello Superior de Deportes.
3. Na súa modalidade de outorgamento a equipos deportivos, o distintivo concederáselle a aquel que durante cada tempada deportiva demostrase o mellor cumprimento do réxime de prevención e loita contra a violencia, o racismo, a xenofobia e a intolerancia no deporte, para o cal se tomarán en consideración:
- a) Os datos estatísticos do número de sancións disciplinarias impostas durante a tempada aos integrantes do equipo deportivo, extraídos pola Comisión Estatal contra a Violencia, o Racismo, a Xenofobia e a Intolerancia no Deporte das decisións que lle comunican os órganos disciplinarios competentes en aplicación do artigo 33.4 do Real decreto 1591/1992, do 23 de decembro, sobre disciplina deportiva.
 - b) Os datos que voluntariamente lle subministren os equipos deportivos á Comisión contra a Violencia, o Racismo, a Xenofobia e a Intolerancia no Deporte nos quince días naturais seguintes á celebración do último encontro ordinario da tempada da liga profesional correspondente, en relación con actividades de fomento da paz, a tolerancia e a convivencia no deporte que realizasen os integrantes do equipo en cuestión durante a tempada.
4. Na súa modalidade de outorgamento a afeccións, o distintivo «Xogo Limpo» concederáselle a aquela que durante a tempada demostrase o mellor cumprimento do réxime de prevención e loita contra a violencia, o racismo, a xenofobia e a intolerancia no deporte, para o cal se tomarán en consideración:
- a) Os datos relativos a sancións impostas no marco do título II da Lei 11/2007, do 11 de xullo, como consecuencia de incidentes durante o desenvolvemento de espectáculos deportivos ou próxima a súa celebración, que serán extraídos pola Comisión contra a Violencia, o Racismo, a Xenofobia e a Intolerancia no Deporte das comunicacións recibidas das autoridades gubernativas competentes.
 - b) Os datos que voluntariamente subministren á Comisión contra a Violencia, o Racismo, a Xenofobia e a Intolerancia no Deporte os grupos de afeccionados formalmente inscritos no libro de rexistro de seguidores do club, nos quince días seguintes á celebración do último encontro ordinario da tempada da liga profesional correspondente, sobre as actividades de fomento da paz, a tolerancia e a convivencia no deporte que realizasen durante a tempada.
5. A Comisión Permanente da Comisión contra a Violencia, o Racismo, a Xenofobia e a Intolerancia no Deporte elevaralle a proposta de concesión do distintivo «Xogo Limpo» á Presidencia do Consello Superior de Deportes no prazo dun mes desde a celebración do último encontro ordinario da liga correspondente, tomando en consideración os datos dispoñibles nese momento.

Artigo 89. *Uso do distintivo.*

1. O distintivo, que se concederá á finalización de cada tempada deportiva, poderá ser utilizado polo beneficiario durante a tempada inmediatamente seguinte.
2. Os equipos deportivos que recibisen o distintivo «Xogo Limpo» poderano incluír durante o período de disfrute del no seu equipamento deportivo e nas súas accións de

difusión. A súa incorporación ás equipacións oficiais dos deportistas non se poderá considerar como publicidade para efectos das regulamentacións deportivas ou dos contratos sobre dereitos de imaxe subscritos pola entidade.

Artigo 90. *Retirada do distintivo.*

O distintivo poderá ser retirado durante o seu período de disfrute pola Presidencia do Consello Superior de Deportes, por proposta da Comisión Permanente da Comisión Estatal contra a Violencia, o Racismo, a Xenofobia e a Intolerancia no Deporte, por circunstancias sobrevidas e debidamente motivadas.